

萬有文庫

第一集一千種

王雲五主編

白香山集

(三)

白居易著

商務印書館發行

白香山集

(三)

白居易著

國學基本叢書

# 白香山集

## 卷九

感傷一 古調詩 五言 五十五首

西明寺牡丹花時憶元九

前年題名處。今日看花來。一作芸香吏。三見牡丹開。豈獨花堪惜。方知老暗催。何況尋花伴。東都去未迴。詎知紅芳側。春盡思悠哉。

傷楊弘貞

顏子昔知命。仲尼惜其賢。楊生亦好學。不幸今復然。誰識天地意。獨與龜鶴年。

權攝昭應早秋書事寄元拾遺兼呈李司錄

夏閏秋候早。七月風騷騷。渭川烟景晚。驪山宮殿高。丹殿子司諫。赤縣我徒勞。相去半日程。不得同遊遨。到官來十日。覽鏡生二毛。可憐趨走吏。塵土滿青袍。郵亭擁兩驛。簿書堆六曹。爲問綱紀掾。何必使鉛刀。

新栽竹

佐邑意不適。閉門秋草生。何以娛野性。種竹百餘莖。見此階上色。憶得山中情。有時公事暇。盡日繞欄行。勿言根未固。勿言陰未成。已覺庭宇內。稍稍有餘清。最愛近窗臥。秋風枝有聲。

秋霖中過尹縱之仙遊山居

慘慘八月暮。連連三日霖。邑居尙愁寂。況乃在山林。林下有志士。苦學惜光陰。歲晚千萬慮。併入方寸心。巖鳥共旅宿。草蟲伴愁吟。秋天床席冷。雨夜燈火深。憐君寂寞意。攜酒一相尋。

寄江南兄弟

分散骨肉戀。趨馳名利牽。一奔塵埃馬。一汎風波船。忽憶分首時。惘默秋風前。別來朝復夕。積日成七年。花落城中地。春深江上天。登樓東南望。烏滅烟蒼然。相去復幾許。道里近三千。平地猶難見。况乃隔山川。

曲江早秋

秋波紅蓼水。夕照青蕪岸。獨信馬蹄行。曲江池四畔。早涼晴後至。殘暑暝來散。方喜炎燠銷。復嗟時節換。我年三十六。冉冉昏復旦。人壽七十稀。七十新過半。且當對酒笑。勿起臨風歎。

寄題盤屋廳前雙松

憶昨爲吏日。折腰多苦辛。歸家不自適。無計慰心神。手栽兩樹松。聊以當嘉賓。乘春日一往。生意漸欣欣。清韻度秋在。綠茸隨日新。始憐澗底色。不憶城中春。有時畫掩關。雙影對一身。盡日不寂寞。意中如三人。忽奉宣室詔。徵爲文苑臣。閒來一惆悵。長似別交親。早知烟翠前。攀翫不逡巡。悔從白雲裏。移爾落鸞塵。

翰林院中感秋懷王質夫

何處感時節。新蟬禁中聞。宮槐有秋意。風夕花紛紛。寄跡鴛鴦行。歸心鷗鷺羣。唯有王居士。知予憶白雲。何日仙遊寺。潭前秋見君。

禁中月

海上明月出。禁中清夜長。東南樓殿白。稍稍上宮牆。淨落金塘水。明浮玉砌霜。不比人間見。塵土污清光。  
贈賣松者

一束蒼蒼色。知從澗底來。斲堀經幾日。枝葉滿塵埃。不買非他意。城中無地栽。

初見白髮

白髮生一莖。朝來明鏡裏。勿言一莖少。滿頭從此始。青山方遠別。黃綬初從仕。未料容鬢間。蹉跎忽如此。

別元九後詠所懷

零落桐葉雨。蕭條槿花風。悠悠早秋意。生此幽閑中。況與故人別。中懷正無悰。勿云不相送。心到青門東。  
相知豈在多。但問同不同。同心一人去。坐覺長安空。

禁中秋宿

風飄朱裏幕。雨冷通中枕。耿耿背斜燈。秋床一人寢。

早秋曲江感懷

離離暑雲散。嫋嫋涼風起。池上秋又來。荷花半成子。朱顏自銷歇。白日無窮已。人壽不如山。年光忽於水。  
青蕪與紅蓼。歲歲秋相似。去歲此悲秋。今秋復來此。

寄元九

身爲近密拘。心爲名檢縛。月夜與花時。少逢盃酒樂。唯有元夫子。閒來同一酌。把手或酣歌。展眉時笑謔。  
今春除御史。前月之東洛。別來未開顏。塵埃滿樽杓。蕙風晚香盡。槐雨餘花落。秋意一蕭條。離容兩寂寞。

况隨白日老。共負青山約。誰識相念心。講鷹與籠鶴。

春暮寄元九

梨花結成實。燕卵化爲雛。時物又若此。道情復何如。但覺日月促。不嗟年歲徂。浮生都是夢。老少亦何殊。唯與故人別。江陵初謫居。時時一相見。此意未全除。

早梳頭

夜沐早梳頭。窗明秋鏡曉。颯然握中髮。一沐知一少。年事漸蹉跎。世緣方繳繞。不學空門法。老病何由了。未得無生心。白頭亦爲夭。

出關路

山川函谷路。塵土游子顏。蕭條去國意。秋風生故關。

別舍弟後月夜

悄悄初別夜。去住兩盤桓。行子孤燈店。居人明月軒。平生共貧苦。未必日成歡。及此暫爲別。懷抱已憂煩。况是庭葉盡。復思山路寒。如何爲不念。馬瘦衣裳單。

新豐路逢故人

塵土長路晚。風烟廢宮秋。相逢立馬語。盡日此橋頭。知君不得意。鬱鬱來西游。惆悵新豐店。何人識馬周。

金鑾子碎日

行年欲四十。有女曰金鑾。生來始周歲。學坐未能言。慚非達者懷。未免俗情憐。從此累身外。徒云慰目前。

若無天折患。則有婚嫁牽。使我歸山計。應遲十五年。

青龍寺早夏

塵埃經小雨。地高倚長坡。日西寺門外。景氣含清和。閒有老僧立。靜無凡客過。殘鶯意思盡。新葉陰涼多。春去未幾日。夏雲忽嵯峨。朝朝感時節。年鬢暗蹉跎。胡爲戀朝市。不去歸烟蘿。青山寸步地。自問心如何。

秋題牡丹叢

晚叢白露夕。衰葉涼風朝。紅豔久已歇。碧芳今亦銷。幽人坐相對。心事共蕭條。

勸酒寄元九

薤葉有朝露。檣枝無宿花。君今亦如此。促促生有涯。既不逐禪僧。林下學楞伽。又不隨道士。山中煉丹砂。百年夜分半。一歲春無多。何不飲美酒。胡然自悲嗟。俗號銷憂藥。神速無以加。一盃驅世慮。兩盃反天和。三盃卽酩酊。或笑任狂歌。陶陶復兀兀。吾孰知其他。况在名利途。平生有風波。深心藏陷穽。巧言織網羅。舉目非不見。不醉欲如何。

曲江感秋

沙草新雨地。岸柳涼風枝。三年感秋意。併在曲江池。早蟬已嘹唳。晚荷復離披。前秋去秋思。一一生此時。昔人三十二。秋興已云悲。我今欲四十。秋懷亦可知。歲月不虛設。此身隨日衰。暗老不自覺。直到鬢成絲。

酬張太祝晚秋臥病見寄

高才淹禮寺。短羽翔禁林。西街居處遠。北闕官曹深。君病不來訪。我忙難往尋。差池終日別。寥落經年心。

露溼綠蕪地。月寒紅樹陰。况茲獨愁夕。聞彼相思吟。上歎言笑阻。下嗟時歲侵。容衰曉窗鏡。思苦秋絃琴。一章錦繡段。八韻瓊瑤音。何以報珍重。慚無雙南金。

立秋日曲江憶元九

下馬柳陰下。獨上堤上行。故人千萬里。新蟬三兩聲。城中曲江水。江上江陵城。兩地新秋思。應同此日情。

早朝賀雪寄陳山人

長安盈尺雪。早朝賀君喜。將赴銀臺門。始出新昌里。上堤馬蹄滑。中路蠟燭死。十里向北行。寒風吹破耳。待漏五門外。候對三殿裏。鬚鬢凍生冰。衣裳冷如水。忽思仙游谷。暗謝陳居士。暖覆褐裘眠。日高應未起。初與元九別。後忽夢見之。及寤而書適至。兼寄桐花詩。悵然感懷。因此寄。

永壽寺中語。新昌坊北分。歸來數行淚。悲事不悲君。悠悠藍田路。自云無消息。計君食宿程。已過商山北。昨夜雲四散。千里同月色。曉來夢見君。應是君相憶。夢中握君手。問君意何如。君言苦相憶。無人可寄書。覺來未及說。叩門聲冬冬。言是商州使。送君書一封。枕上忽驚起。顛倒著衣裳。開緘見手札。一紙十三行。上論遷謫心。下說離別腸。心腸都未盡。不暇敘炎涼。云作此書夜。夜宿商州東。獨對孤燈坐。陽城山館中。夜深作書畢。山月向西斜。月前何所有一樹紫桐花。桐花半落時。復道正相思。殷勤書背後。兼寄桐花詩。桐花詩八韻。思緒一何深。以我今朝意。憶君此夜心。一章三遍讀。一句十迴吟。珍重八十字。字字化爲金。

和元九悼往

美人別君去。自去無處尋。舊物零落盡。此情安可任。唯有纈紗幌。塵埃日夜侵。馨香與顏色。不似舊時深。



透影燈耿耿。籠光月沉沉。中有孤眠客。秋涼生夜衾。舊宅牡丹院。新墳松柏林。夢中咸陽淚。覺後江陵心。含此隔年恨。發爲中夜吟。無論君自感。聞者欲沾襟。

重到渭上舊居

舊居清渭曲。開門當蔡渡。十年方一還。幾欲迷歸路。追思昔日行。感傷故游處。插柳作高林。種桃成老樹。因驚成人者。盡是舊童孺。試問舊老人。半爲繞村墓。浮生同過客。前後遞來去。白日如弄珠。出沒光不住。人物日改變。舉目悲所遇。迴念念我身。安得不衰暮。朱顏銷不歇。白髮生無數。唯有山門外。三峯色如故。

白髮

白髮知時節。暗與我有期。今朝日陽裏。梳落數莖絲。家人不慣見。憫默爲我悲。我云何足怪。此意爾不知。凡人年三十。外壯中已衰。但思寢食味。已減二十時。况我今四十。本來形貌羸。書魔昏兩眼。酒病况四肢。親愛日零落。在者仍別離。身心久如此。白髮生已遲。由來生老死。三病長相隨。除却無生念。人間無藥治。

秋日

池殘寥落水。窗下悠揚日。嫋嫋秋風多。槐花半成實。下有獨立人。年來四十一。

將之饒州江浦夜泊

明月滿深浦。愁人臥孤舟。煩寃寢不得。夏夜長於秋。苦乏衣食資。遠爲江海游。光陰坐遲暮。鄉國行阻脩。身病向鄱陽。家貧寄徐州。前事與後事。豈堪心併憂。憂來起長望。但見江水流。雲樹藹蒼蒼。烟波淡悠悠。故園迷處所。一念堪白頭。

思歸

養無晨昏膳。隱無伏臘資。遂求及親祿。僂俛來京師。薄俸未及親。別家已經時。冬積溫席戀。春遠採蘭期。夏至一陰生。稍稍夕漏遲。塊然抱愁者。夜長獨先知。悠悠鄉關路。夢去身不隨。坐惜時節變。蟬鳴槐花枝。

冀城北原作

野色何莽蒼。聲秋亦蕭疏。風吹黃埃起。落日驅征車。何代此開國。封疆百里餘。古今不相待。朝市無常居。昔人城邑中。今變爲丘墟。昔人墓田中。今化爲里閭。廢興相催促。日月互居諸。世變無遺風。焉能知其初。行人千載後。懷古空躊躇。

客路感秋寄明準上人

日暮天地冷。雨霽山河清。長風從西來。草木凝秋聲。已感歲倏忽。復傷物凋零。孰能不慳悽。天時牽人情。借問空門子。何法易修行。使我忘得心。不教煩惱生。

遊襄陽懷孟浩然

楚山碧巖巖。漢水碧湯湯。秀氣結成象。孟氏之文章。今我飄遺文。思人至其鄉。清風無人繼。日暮空襄陽。南望鹿門山。藹若有餘芳。舊隱不知處。雲深樹蒼蒼。

秋暮西歸途中書情

耿耿旅燈下。愁多常少眠。思鄉貴早發。發在雞鳴前。九月草木落。平蕪連遠山。秋陰和曙色。萬木蒼蒼然。去秋偶東遊。今秋始西旋。馬瘦衣裳破。別家來二年。憶歸復愁歸。歸無一囊錢。心雖非蘭膏。安得不自然。

秋懷

月出照北堂。光華滿階墀。涼風從西至。草木日夜衰。桐柳減綠陰。蕙蘭銷碧滋。感物私自念。我心亦如之。安得長少壯。盛衰迫天時。人生如石火。爲樂常苦遲。

別楊穎士盧克柔殷堯藩

倦鳥暮歸林。浮雲晴歸山。獨有行路子。悠悠不知還。人生苦營營。終日羣動間。所務雖不同。同歸於不閑。扁舟來楚鄉。疋馬往秦關。離憂繞心曲。宛轉如循環。且持一盃酒。聊以開離顏。

題贈定光上人

二十身出家。四十心離塵。得徑入大道。乘此不退輪。一坐十五年。林下秋復春。春花與秋氣。不感無情人。我來如有悟。潛以心照身。誤落聞見中。憂喜傷形神。安得遺耳目。冥然反天真。

祇役駱口驛喜蕭侍御書至兼覩新詩吟諷通宵因寄八韻

日暮心無慘。吏役正營營。忽驚芳信至。復與新詩并。是時天無雲。山館有月明。月下讀數遍。風前吟一聲。一吟三四歎。聲盡有餘清。雅哉君子文。詠性不詠情。使我靈府中。鄙吝不得生。始知聽韶濩。可使心和平。

酬李少府曹長官舍見贈

低腰復斂手。心體不遑安。一落風塵下。方知爲吏難。公事與日長。宦情隨歲闌。惆悵青袍袖。芸香無半殘。賴有李夫子。此懷聊自寬。兩心如止水。彼此無波瀾。往往簿書暇。相勸強爲歡。白馬曉蹋雪。淥觴春暖寒。戀月夜同宿。愛山晴共看。野性自相近。不是爲同官。

留別

秋涼卷朝簾。春暖撤夜衾。雖是無情物。欲別尙沈吟。况與有情別。別隨情淺深。二年歡笑意。一旦東西心。獨留誠可念。同行力不任。前事詎能料。後期諒難尋。唯有潺湲淚。不惜共沾衿。

曉別

曉鼓聲已半。離筵坐難久。請君斷腸歌。送我和淚酒。月落欲明前。馬嘶初別後。浩浩暗塵中。何由見迴首。

北園

北園東風起。雜花次第開。心知須臾落。一日三四來。花下豈無酒。欲酌復遲迴。所思眇千里。誰勸我一盃。惜情李花

樹小花鮮妍。香繁條軟弱。高低二三尺。重疊千萬萼。朝豔藹霏霏。夕凋紛漠漠。辭枝朱粉細。覆地紅綃薄。由來好顏色。嘗苦易銷燦。不見萋蕩花。狂風吹不落。

照鏡

皎皎青銅鏡。斑斑白絲鬢。豈復更藏年。實年君不信。

新秋

西風飄一葉。庭前颯已涼。風池明月水。衰蓮白露房。其奈江南夜。緜緜自此長。

夜雨

早蛩啼復歇。殘燈滅又明。隔窗知夜雨。芭蕉先有聲。

秋江送客

秋鴻次第過。哀猿朝夕聞。是日孤舟客。此地亦離羣。濛濛潤衣雨。漠漠冒帆雲。不醉溱陽酒。烟波愁殺人。

感逝寄遠

昨日聞甲死。今朝聞乙死。知識三分中。二分化爲鬼。逝者不復見。悲哉長已矣。存者今如何。去我皆萬里。平生知心者。屈指能有幾。通果澧鳳州。眇然四君子。相思俱老大。浮世如流水。應歎舊交遊。凋零一如此。何當一杯酒。開眼笑相視。

秋月

夜初色蒼然。夜深光浩然。稍轉西廊下。漸滿南窗前。况是綠蕪地。復茲清露天。落葉聲策策。驚鳥影翩翩。棲禽尙不穩。愁人安可眠。

卷十

感傷二 古調 五言 七十八首

朱陳村詩

徐州古豐縣。有村曰朱陳。去縣百餘里。桑麻青氛氳。機梭聲扎扎。牛驢走紛紛。女汲澗中水。男採山上薪。縣遠官事少。山深人俗淳。有財不行商。有丁不入軍。家家守村業。頭白不出門。生爲陳村民。死爲陳村塵。田中老與幼。相見何欣欣。一村唯兩姓。世世爲婚姻。親疏居有族。少長游有羣。黃雞與白酒。歡會不隔旬。

生者不遠別。嫁娶先近鄰。死者不遠葬。墳墓多邊村。既安生與死。不苦形與神。所以多壽考。往往見玄孫。我生禮義鄉。少小苦且貧。徒學辯是非。祇自取辛勤。世法貴名教。士人重官婚。以此自極楛。信爲大謬人。十歲解讀書。十五能屬文。二十舉秀才。三十爲諫臣。下有妻子累。上有君親恩。承家與事國。望此不肖身。憶昨旅遊初。迨今十五春。孤舟三適楚。羸馬四經秦。晝行有飢色。夜寢無安魂。東西不暫住。來往若浮雲。離亂失故鄉。骨肉多散分。江南與江北。各有平生親。平生終日別。逝者隔年聞。朝憂臥至暮。夕哭坐達晨。悲火燒心曲。愁霜侵鬢根。一生苦如此。長羨陳村民。

讀鄧魴詩

塵架多文集。偶取一卷披。未及看姓名。疑是陶潛詩。看名知是君。惻惻令我悲。詩人多蹇厄。近日誠有之。京兆杜子美。猶得一拾遺。襄陽孟浩然。亦聞鬢成絲。嗟君兩不如。三十在布衣。擢第祿不及。新婚妻未歸。少年無疾患。溘死於路歧。天不與爵壽。唯與好文詞。此理勿復道。巧曆不能推。

寄元九 自此後在渭村作

晨雞纔發聲。夕雀俄斂翼。晝夜往復來。疾如出入息。非徒改年貌。漸覺無心力。自念因念君。俱爲老所逼。君年雖較少。顛頓適南國。三年不放歸。炎瘴銷顏色。山無殺草雪。水有含沙蜮。健否遠不知。書多隔年得。願君少愁苦。我亦加飧食。各保金石軀。以慰長相憶。

秋夕

葉聲落如雨。月色白似霜。夜深方獨臥。誰爲拂塵牀。

夜雨

我有所念人。隔在遠遠鄉。我有所感事。結在深深腸。鄉遠去不得。無日不瞻望。腸深解不得。無夕不思量。况此殘燈夜。獨宿在空堂。秋天殊未曉。風雨正蒼蒼。不學頭陀法。前心安可忘。

秋霽

金火不相待。炎涼雨中變。林晴有殘蟬。巢冷無留鷺。沉吟卷長簾。惻愴收團扇。向夕稍無泥。閑步青苔院。月出砧杵動。家家擣秋練。獨對多病妻。不能理針線。冬衣殊未製。夏服行將綻。何以迎早秋。一盃聊自勸。

歎老三首

晨興照清鏡。形影兩寂寞。少年辭我去。白髮隨梳落。萬化成於漸。漸衰看不覺。但恐鏡中顏。今朝老於昨。人生少滿百。不得長歡樂。誰會天地心。千齡與龜鶴。吾聞善醫者。今古稱扁鵲。萬病皆可治。唯無治老藥。我有一握髮。梳理何稠直。昔似玄雲光。如今素絲色。匣中有舊鏡。欲照先歎息。自從頭白來。不欲明磨拭。鴉頭與鶴頭。至老長如墨。獨有人鬢毛。不得終身黑。前年種桃核。今歲成花樹。去歲新嬰兒。今年已學步。但驚物成長。不覺身衰暮。去矣欲何如。少年留不住。因書今日意。徧寄諸親故。壯歲不歡娛。長年當悔悟。

送兄弟迴雪夜

日晦雲氣黃。東北風切切。時從村南還。新與兄弟別。離襟淚猶濕。迴馬嘶未歇。欲歸一室坐。天陰多無月。夜長火消盡。歲暮雨凝結。寂寞滿爐灰。飄冷上階雪。對雪畫寒灰。殘燈明復滅。灰死如我心。雪白如我髮。

所遇皆如此。頃刻堪愁絕。迴念入坐忘。轉憂作禪悅。平生洗心法。正爲今宵設。

溪中早春

南山雪未盡。陰嶺留殘白。西澗冰已銷。春溜含新碧。東風來幾日。蟄動萌草拆。潛知陽和功。一日不虛擲。愛此天氣暖。來拂溪邊石。一坐欲忘歸。暮禽聲嘖嘖。蓬蒿隔桑棗。隱映烟火夕。歸來問夜飧。家人烹薺麥。

同友人尋澗花

聞有澗底花。貰得村中酒。與君來較遲。已逢搖落後。臨觴有遺恨。悵望空溪口。記取花發時。期君重攜手。我生日日老。春色年年有。且作來歲期。不知身健否。

登村東古塚

高低古時塚。上有牛羊道。獨立最高頭。悠哉此懷抱。迴頭向村望。但見荒田草。村人不愛花。多種粟與棗。自來此村住。不覺風光好。花少鶯亦稀。年年春暗老。

夢裴相公

五年生死隔。一夕夢魂通。夢中如往日。同直金鑾宮。髣髴金紫色。分明冰玉容。勤勤相眷意。亦與平生同。既寤知是夢。惘然情未終。追想當時事。何殊昨夜中。自我學心法。萬緣成一空。今朝爲君子。流涕一霑胸。

晝寢

坐整白單衣。起穿黃草屨。朝飧盪漱畢。徐下塔前步。暑風微變候。晝刻漸加數。院靜地陰陰。鳥鳴新葉樹。獨行還獨臥。夏景殊未暮。不作午時眠。日長安可度。



別行簡

漠漠病眼花。星星愁鬢雪。筋骸已衰憊。形影仍分訣。梓州二千里。劍門五六月。豈是遠行時。火雲燒棧熱。何言巾上淚。乃是腸中血。念此早歸來。莫作經年別。

觀兒戲

齟齬七八歲。綺紈三四兒。弄塵復鬪草。盡日樂嬉嬉。堂上長年客。髮間新有絲。一看竹馬戲。每憶童騃時。童騃饒戲樂。老大多憂悲。靜念彼與此。不知誰是癡。

歎常生

西村常氏子。臥疾不須臾。前旬猶訪我。今日忽云殂。時我病多暇。與之同野居。園林青藹藹。相去數里餘。村鄰無好客。所遇唯農夫。之子何如者。往還猶勝無。于今亦已矣。可爲一長吁。

寄元九

一病經四年。親朋書信斷。窮通合易交。自笑知何晚。元君在荊楚。去日唯云遠。彼獨是何人。心如石不轉。憂我貧病身。書來唯勸勉。上言少愁苦。下道加殮飯。憐君爲謫吏。窮薄家貧徧。三寄衣食資。數盈二十萬。豈是貪衣食。感君心繾綣。念我口中食。分君身上暖。不因身病久。不因命多蹇。平生親友心。豈得知深淺。

以鏡贈別

人言似明月。我道勝明月。明月非不明。一年十二缺。豈如玉匣裏。如水長澄澈。月破天暗時。圓明獨不歇。我慚貌醜老。繞鬢斑斑雪。不如贈少年。迴照青絲髮。因君千里去。持此將爲別。

城上對月期友人不至

古人惜晝短。勸令秉燭遊。况此迢迢夜。明月滿西樓。復有盈樽酒。置在城上頭。期君君不至。人月兩悠悠。照水烟波白。照人肌髮秋。清光正如此。不醉卽須愁。

念金鑿子二首

衰病四十身。嬌癡三歲女。非男猶勝無。慰情時一撫。一朝捨我去。魂影無處所。况念天化時。嘔啞初學語。始知骨肉愛。乃是憂悲聚。唯思未有前。以理遣傷苦。忘懷日已久。三度移寒暑。今日一傷心。因逢舊乳母。

又一首

與爾爲父子。八十有六旬。忽然又不見。邇來三四春。形質本非實。氣聚偶成身。恩愛元是妄。緣合暫爲親。念茲庶有悟。聊用遣悲辛。慚將理自尊。不是忘情人。

對酒

人生一百歲。通計三萬日。何況百歲人。人間百無一。賢愚共零落。貴賤同埋沒。東岱前後魂。北邙新舊骨。復聞藥誤者。爲愛延年術。又有憂死者。爲貪政事筆。藥誤不得老。憂死非因疾。誰人言最靈。知得不知失。何如會親友。飲此盃中物。能沃煩慮銷。能陶眞性出。所以劉阮輩。終年醉兀兀。

渭村雨歸

渭水寒漸落。離離蒲稗苗。閑旁沙邊立。看人刈葦苕。近水風景冷。晴明猶寂寥。復茲夕陰起。野思重蕭條。蕭條獨歸路。暮雨墜村橋。

論懷

黑頭日已白。白面日已黑。人生未死間。變化何終極。常言在己者。莫若形與色。一朝改變來。止遏不能得。况彼身外事。悠悠通與塞。

喜友至留宿

村中少賓客。柴門多不開。忽聞車馬至。云是故人來。况值風雨夕。愁心正悠哉。願君且同宿。盡此手中杯。人生開口笑。百年都幾迴。

西原晚望

花菊引閒行。行上西原路。原上晚無人。因高聊四顧。南阡有烟火。北陌連墟墓。村鄰何蕭疏。近者猶百步。吾廬在其下。寂寞風日暮。門外轉枯蓬。籬根伏寒兔。故園汴水上。離亂不堪去。近歲始移家。飄然此村住。新屋五六間。古槐八九樹。便是衰病身。此生終老處。

感鏡

美人與我別。留鏡在匣中。自從花顏去。秋水無芙蓉。經年不開匣。紅埃覆青銅。今朝一拂拭。自照顛顛容。照罷重惆悵。背有雙盤龍。

村居臥病三首

戚戚抱羸病。悠悠度朝暮。夏木纔結陰。秋蘭已含露。前日巢中卵。化作雛飛去。時日穴中蟲。蛻爲蟬上樹。四時未常歇。一物不暫住。唯有病客心。沉然獨如故。

又一首

新秋久病客。起步村南道。盡日不逢人。蟲聲徧荒草。西風吹白露。野綠秋仍早。草木猶未傷。先傷我懷抱。朱顏與玄鬢。強健幾時好。况爲憂病侵。不得依年老。

又一首

種黍三十畝。雨來苗漸大。種韭二十畦。秋來欲堪刈。望黍作冬酒。留韭爲春菜。荒村百物無。待此養衰瘵。葺廬備陰雨。補褐防寒歲。病身知幾時。且作明年計。

沐浴

經年不沐浴。塵垢滿肌膚。今朝一澡濯。衰瘦頗有餘。老色頭鬢白。病形支體虛。衣寬有臃帶。髮少不勝梳。自問今年幾。春秋四十初。四十已如此。七十復何如。

栽松二首

小松未盈尺。心愛手自移。蒼然澗底色。雲溼烟霏霏。栽植我年晚。長成君性遲。如何過四十。種此數寸枝。得見成陰否。人生七十稀。

愛君抱晚節。憐君含直文。欲得朝朝見。塔前故種君。知君死則已。不死會凌雲。

病中友人相訪

臥久不記日。南窗昏復昏。蕭條草簷下。寒雀朝夕聞。強扶牀前杖。起向庭中行。偶逢故人至。便當一逢迎。移榻就斜日。披裘倚前楹。閒談勝服藥。稍覺有心情。

自覺二首

四十未爲老。憂傷早衰惡。前歲二毛生。今年一齒落。形骸日損耗。心事同蕭索。夜寢與朝飧。其間味亦薄。同歲崔舍人。容光方灼灼。始知年與貌。衰盛隨憂樂。畏老老轉迫。憂病病彌縛。不畏復不憂。是除老病藥。

又一首

朝哭心所愛。暮哭心所親。親愛零落盡。安用身獨存。幾許平生歡。無限骨肉恩。結爲腸間痛。聚作鼻頭辛。悲來四支緩。泣盡雙眸昏。所以年四十。心如七十人。我聞浮圖教。中有解脫門。置心爲止水。視身如浮雲。斗藪垢穢衣。度脫生死輪。胡爲戀此苦。不去猶逡巡。迴念發弘願。願此見在身。但受過去報。不結將來因。誓以智惠水。永洗煩惱塵。不將恩愛子。更種憂悲根。

雨夜有念

以道治心氣。終歲得晏然。何乃戚戚意。忽來風雨天。旣非慕榮顯。又不恤飢寒。胡爲悄不樂。抱膝殘燈前。形影暗相問。心默對以言。骨肉能幾人。各在天一端。吾兄寄宿州。吾弟容東川。南北五千里。我身在中間。欲去病未能。欲住心不安。有如波上舟。此縛而彼牽。自我向道來。于今六七年。鍊成不二性。銷盡千萬緣。唯有恩愛火。往往猶熬煎。豈是藥無効。病多難盡蠲。

寄楊六

青宮官冷靜。赤縣事繁劇。一閒復一忙。動作經時隔。清觴久廢酌。白日頓虛擲。念此忽踟躕。悄然心不適。豈無舊交結。久別成遷易。亦有新往還。相見多形迹。唯君於我分。堅久如金石。何況老大來。人情重姻戚。

會稀歲月急。此事真可惜。幾迴開口笑。便到髭鬚白。公門苦鞅掌。晝日無閒隙。猶冀乘暝來。靜言同一夕。

送春

三月三十日。春歸日復暮。惆悵問春風。明朝應不住。送春曲江上。眷眷東西顧。但見撲水花。紛紛不知數。人生似行客。兩足無停步。日日進前程。前程幾多路。兵刃與水火。盡可遠之去。唯有老到來。人間無避處。感時良爲己。獨倚池南樹。今日送春心。心如別親故。

哭李三

去年渭水曲。秋時訪我來。今年常樂里。春日哭君迴。哭君仰問天。天意安在哉。若必奪其壽。何如不與才。落然身後事。妻病女嬰孩。

別李十一後重寄 自此後江州路上作

秋日正蕭條。驅車出蓬華。迴望青門道。目極心鬱鬱。豈獨戀鄉土。非關慕簪紱。所愴別李君。平生同道術。俱承金馬詔。聯乘諫臣筆。共上青雲梯。中途一相失。江湖我方往。朝廷君不出。蕙帶與華簪。相逢是何日。

初出藍田路作

停驂問前路。路在秋雲裏。蒼蒼縣南道。去途從此始。絕頂忽盤上。衆山皆下視。下視千萬峯。峯頭如浪起。朝經韓公坂。夕次藍橋水。潯陽僅四千。始行七十里。人煩馬蹄跼。勞苦已如此。

仙娥峯下作

我爲東南行。始登商山道。商山無數峯。最愛仙娥好。參差樹若插。匝匝雲如抱。渴望寒玉泉。香與紫芝草。

青崖屏削碧。白石牀鋪綺。向無如此物。安足留四皓。感彼私自問。歸山何不早。可能塵土中。還隨衆人老。

微雨夜行

漠漠秋雲起。稍稍夜寒生。但覺衣裳溼。無點亦無聲。

再到襄陽訪問舊居

昔到襄陽日。髣髴初有髭。今過襄陽日。髣髴半成絲。舊遊都似夢。乍到忽如歸。東郭蓬蒿宅。荒涼今屬誰。故知多零落。閭井亦遷移。獨有秋江水。烟波似舊時。

寄微之三首

江州望通州。天涯與地末。有山萬丈高。有江千里闊。間之以雲霧。飛鳥不可越。誰知千古險。爲我二人設。通州君初到。鬱鬱愁如結。江州我方去。迢迢行未歇。道路日乖隔。音信日斷絕。因風欲寄語。地遠聲不徹。生當復相逢。死當從此別。

又一首

君遊襄陽日。我在長安住。今君在通州。我過襄陽去。襄陽九里郭。樓雉連雲樹。顧此稍依依。是君舊遊處。蒼茫蒹葭水。中有潯陽路。此去更相思。江西少親故。

又一首

去國日已遠。喜逢物似人。如何含此意。江上坐思君。有如河嶽氣。相合方氛氳。狂風吹中絕。兩處成孤雲。風迴終有時。雲合豈無因。努力各自愛。窮通我爾身。

舟中雨夜

江雲暗悠悠。江風冷脩脩。夜雨滴船背。夜浪打船頭。船中有病客。左降向江州。

夜聞歌者

夜泊鸚鵡洲。秋江月澄澈。鄰船有歌者。發調堪愁絕。歌罷繼以泣。泣聲通復咽。尋聲見其人。有婦顏如雪。獨倚帆檣立。娉婷十七八。夜淚似真珠。雙雙墮明月。借問誰家婦。歌泣何淒切。一問一嚬襟。低眉終不說。

江樓聞砧

江人授衣晚。十月始聞砧。一夕高樓月。萬里故園心。

宿東林寺

經窗燈焰短。僧爐火氣深。索落廬山夜。風雪宿東林。

憶洛下故園

潯陽遷謫地。洛陽離亂年。烟塵三川上。炎瘴九江邊。鄉心坐如此。秋風仍颯然。

贈別崔五

朝送南去客。暮迎北來賓。執云當大路。少遇心所親。勞者念息肩。熱者思濯身。何如愁獨日。忽見平生人。平生已不淺。是日重殷勤。問君何處來。及此江亭春。江天春多陰。夜月隔重雲。移樽樹間飲。燈照花紛紛。一會不易得。餘事何足云。明朝又分手。今夕且懽忻。

春晚寄微之



三月江水闊。悠悠桃花波。年芳與心事。此地共蹉跎。南國方譴謫。中原正兵戈。眼前故人少。頭上白髮多。通州更迢遞。春盡復如何。

漸老

今朝復明日。不覺年齒暮。白髮逐梳落。朱顏辭鏡去。當春頗愁寂。對酒寡歡趣。遇境多愴辛。逢人少舊故。形質屬天地。推遷從不住。所怪少年心。銷磨落何處。

送幼史

淮右寇未散。江西歲再徂。故里干戈地。行人風雪途。此時與爾別。江畔立踟蹰。

夜雪

已訝衾枕冷。復見窗戶明。夜深知雪重。時聞折竹聲。

寄行簡

鬱鬱眉多斂。默默口寡言。豈是願如此。舉目誰與歡。去春爾西征。從事巴蜀間。今春我南謫。抱疾江海壖。相去六千里。地絕天邈然。十書九不達。何以開憂顏。渴人多夢飲。饑人多夢飧。春來夢何處。合眼到東川。

首夏

孟夏百物滋。動植一時好。麋鹿樂深林。蟲蛇喜豐草。翔禽愛密葉。游鱗悅新藻。天和遺漏處。而我獨枯槁。一身在天末。骨肉皆遠道。舊國無來人。寇戎塵浩浩。沉憂竟何益。祇自勞懷抱。不如放身心。冥然任天造。潯陽多美酒。可使杯不燥。溢魚賤如泥。烹炙無昏早。朝飯山下寺。暮醉湖中島。何必歸故鄉。茲焉可終老。

孟夏思渭村舊居寄舍弟

嘖嘖雀引雛。稍稍筍成竹。時物感人情。憶我故鄉曲。故園渭水上。十載事樵牧。手種榆柳成。陰陰覆牆屋。兔隱豆苗大。鳥鳴桑椹熟。前年當此時。與爾同遊矚。詩書課弟姪。農圃資僮僕。日暮麥登場。天晴蠶拆簇。弄泉南澗坐。待月東亭宿。興發飲數盃。悶來碁一局。一朝忽分散。萬里仍羈束。井鮒思返泉。籠鶯悔出谷。九江地卑溼。四月天炎燠。苦雨初入梅。瘴雲稍含毒。泥秧水畦稻。灰種畚田粟。已訝殊歲時。仍嗟異風俗。閒登郡樓望。日落江山綠。歸雁拂鄉心。平湖斷人目。殊方我漂泊。舊里君幽獨。何時同一瓢。飲水心亦足。

早蟬

六月初七日。江頭蟬始鳴。石楠深葉裏。薄暮兩三聲。一催衰鬢色。再動故園情。西風殊未起。秋思先秋生。憶昔在東掖。宮槐花下聽。今朝無恨思。雲樹遠濫城。

感情

中庭嚙服玩。忽見故鄉履。昔贈我者誰。東鄰嬋娟子。因思贈時語。特用結終始。永願如履綦。雙行復雙止。自吾謫江郡。漂蕩三千里。爲感長情人。提攜同到此。今朝一惆悵。反覆看未已。人隻履猶雙。何曾得相似。可嗟復可惜。錦表繡爲裏。况經梅雨來。色黯花草死。

南湖晚秋

八月白露降。湖中水芳老。旦夕秋風多。衰荷半傾倒。手攀青楓樹。足蹋黃蘆草。慘淡老容顏。冷落秋懷抱。有兄在淮楚。有弟在蜀道。萬里何時來。烟波白浩浩。

郡廳有樹晚榮早凋人不識名因題其上

潯陽郡廳後有樹不知名。秋先梧桐落。春後桃李榮。五月始萌動。八月已凋零。左右皆松桂。四時鬱青青。豈量雨露恩。霑濡不均平。榮枯各有分。天地本無情。顧我本相類。早衰向晚成。形骸少多病。三十不豐盈。毛髮早改變。四十白毳生。誰教兩蕭索。相對此江城。

感秋懷微之

葉下湖又波。秋風此時至。誰知蕩落心。先納蕭條氣。推遷感流歲。漂泊思同志。昔爲烟霄侶。今作泥塗吏。白鷗毛羽弱。青鳳文章異。各間一籠中。歲晚同顛顛。

因沐感髮寄朗上人二首

年長身轉慵。百事無所欲。乃至頭上髮。經年方一沐。沐稀髮苦落。一沐仍半禿。短鬢經霜蓬。老面辭春木。強年過猶近。衰相來何速。應是煩惱多。心焦血不足。

又一首

漸少不滿把。漸短不盈尺。况茲短少中。日夜落復白。既無神仙術。何除老死籍。祇有解脫門。能度衰苦厄。掩鏡望東寺。降心謝禪客。衰白何足言。剃落猶不惜。

早蟬

月出先照山。風生先動水。亦如早蟬聲。先入閒人耳。一聞愁意結。再聽鄉心起。渭上村蟬聲。先聽渾相似。衡門有誰聽。日暮槐花裏。

苦熱喜涼

經時苦炎暑。心體但煩倦。白日一何長。清秋不可見。歲功成者去。天數極則變。潛知寒燠間。遷次如乘傳。火雲忽朝斂。金風俄夕扇。枕簟遂清涼。筋骸稍輕健。因思望月侶。好卜迎秋宴。經夜無客來。引杯還自勸。

早秋晚望兼呈韋侍

九派繞孤城。城高生遠思。人烟半在船。野水多於地。穿霞日脚直。驅雁風頭利。去國來幾時。江上秋三至。夫君亦淪落。此地同飄寄。憫默向隅心。摧頽觸籠翅。且謀眼前計。莫問胸中事。潯陽酒甚濃。相勸時時醉。

司馬宅

兩徑綠蕪合。霜園紅葉多。蕭條司馬宅。門巷無人過。唯對大江水。秋風朝夕波。

司馬廳獨宿

荒涼滿庭草。偃亞侵簷竹。府吏下廳簾。家僮開被幘。數聲城上漏。一點窗間燭。官曹冷似冰。誰肯來同宿。

夢與李七庾三十三同訪元九

夜夢歸長安。見我故親友。損之在我左。順之在我右。云是二月天。春風出攜手。同過靖安里。下馬尋元九。元九正獨坐。見我笑開口。還指西院花。仍開北亭酒。如言各有故。似惜歡難久。神合俄頃間。神離欠伸後。覺來疑在側。求索無所有。殘燈影閃牆。斜月光穿牖。天明西北望。萬里君知否。老去無見期。踟躕搔白首。

秋槿

風露颯已冷。天色亦黃昏。中庭有槿花。榮落同一晨。秋開已寂寞。夕殞何紛紛。正憐少顏色。復歎不逡巡。

感此因念彼。懷哉聊一陳。男兒老富貴。女子晚婚姻。頭白始得志。色衰方事人。後時不獲已。安得如青春。

答元郎中楊員外喜鳥見寄  
南宮鴛鴦地。何忽鳥來止。故人錦帳郎。聞鳥笑相視。疑鳥報消息。望我歸鄉里。我歸應待鳥頭白。慚愧元郎誤歡喜。

卷十一

感傷三 古體 五言 凡五十三首

初入峽有感

上有萬仞山。下有千丈水。蒼蒼兩崖間。闊狹容一葦。瞿唐呀直瀉。灩澦瀾中峙。未夜黑巖昏。無風白浪起。大石如刀劍。小石如牙齒。一步不可行。况千三百里。蒨蕩竹篾筵。欹危楫師趾。一跌無完舟。吾生繫於此。常聞仗忠信。蠻貊可行矣。自古漂沉人。豈盡非君子。况吾時與命。蹇舛不足恃。常恐不才身。復作無名死。

過昭君村

靈珠產無種。彩雲出無根。亦如彼妹子。生此遐陋村。至麗物難掩。遽選入君門。獨美衆所嫉。終棄於塞垣。惟此希代色。豈無一顧恩。事排勢須去。不得由至尊。白黑既可變。丹青何足論。竟埋岱北骨。不返巴東魂。慘澹晚雲水。依稀舊鄉園。妍姿化已久。但有村名存。村中有遺老。指點爲我言。不取往者戒。恐貽來者冤。至今村女面。燒灼成癩痕。

自江州至忠州

前在潯陽日。已歎賓朋寡。忽忽抱憂懷。出門無處寫。今來轉深僻。窮峽巔山下。五月斷行舟。灘堆正如馬。巴人類猿狖。矍鑠滿山野。敢望見交親。喜逢似人者。

初到忠州登東樓寄萬州楊八使君

山東邑居窄。峽中氣候偏。林巒少平地。霧雨多陰天。隱隱煮鹽火。漠漠燒畬烟。賴此東樓夕。風月時翛然。憑軒望所思。目斷心捐捐。背春有去雁。上水無來船。我懷巴東守。本是關西賢。平生已不淺。流落重相憐。水梗漂萬里。籠禽囚五年。新恩同雨露。遠郡鄰山川。書信雖往復。封疆徒接連。其如美人面。欲見杳無緣。

郡中

鄉路音信斷。山城日月遲。欲知州近遠。階前摘荔枝。

西樓夜

悄悄復悄悄。城隅隱林杪。山郭燈火稀。峽天星漢少。年光東流水。生計枝南鳥。月沒江沉沉。西樓殊未曉。

東樓

脈脈復脈脈。東樓無宿客。城暗雲霧多。峽深田地窄。宵燈向留焰。晨禽初展翮。欲知山高低。不見東方白。

寄王質夫

憶始識君時。愛君世緣薄。我亦吏王畿。不爲名利著。春尋仙遊洞。秋上雲居閣。樓觀水潺潺。龍潭花漠漠。吟詩石上坐。引酒泉邊酌。因話出處心。心期老巖壑。忽從風雨別。遂被簪纓縛。君作出山雲。我爲入籠鶴。

籠深鶴殘。嶺山遠雲飄泊。去處雖不同。同負平生約。今來各何在。老去隨所託。我守巴南城。君佐征西幕。年顏漸衰颯。生計仍蕭索。方舍去國愁。且羨從軍樂。舊遊疑是夢。往事思如昨。相憶春又深。故山花正落。

南賓郡齋卽事寄楊萬州

山上巴子城。山下巴江水。中有窮獨人。強名爲刺史。時時竊自哂。刺史豈如是。倉粟餒家人。黃絲裹妻子。莓苔翳冠帶。霧雨蠹樓雉。銜鼓暮復朝。郡齋臥還起。迴頭望南浦。亦在烟波裏。而我復何嗟。夫君猶滯此。

招蕭處士

峽內豈無人。相逢非所思。門前亦有客。相對不相知。仰望但雲樹。俯顧惟妻兒。寢食起居外。端然無所爲。東郊蕭處士。聊可與開眉。能飲滿盃酒。善吟長句詩。庭前吏散後。江畔路乾時。請君攜竹杖。一赴郡齋期。

庭槐

南方饒竹樹。惟有青槐稀。十種七八死。縱活亦支離。何此郡庭下。一樹獨華滋。蒙蒙碧烟葉。嫋嫋黃花枝。我家渭水上。此樹蔭前墀。忽向天涯見。憶在故園時。人生有情感。遇物牽所思。樹木猶復爾。况見舊親知。

送客回晚興

城上雲霧開。沙頭風浪定。參差亂山出。澹泞平江淨。行客舟已遠。居人酒初醒。嫋嫋秋竹梢。巴蟬聲似磬。

東樓竹

蕭灑城東樓。遶樓多脩竹。森然一萬竿。白粉封青玉。捲簾睡初覺。欹枕看未足。影轉色入樓。牀席生浮綠。空城絕賓客。向夕彌幽獨。樓上夜不歸。此君留我宿。

九日登巴臺

黍香酒初熟。菊暖花未開。閒聽竹枝曲。淺酌茱萸杯。去年重陽日。漂泊溢城隈。今歲重陽日。蕭條巴子臺。旅鬢尋已白。鄉書久不來。臨觴一搔首。坐客亦徘徊。

東城尋春

老色日上面。歡情日去心。今既不如昔。後當不如今。今猶未甚衰。每事力可任。花時仍愛出。酒後尙能吟。但恐如此興。亦隨日銷沉。東城春欲老。勉強一來尋。

江上送客

江花已萎絕。江草已銷歇。遠客何處歸。孤舟今日發。杜鵑聲似哭。湘竹斑如血。共是多感人。仍爲此中別。

桐花

春令有常候。清明桐始發。何此巴峽中。桐花開十月。豈伊物理變。信是土宜別。地氣反寒暄。天時倒生殺。草木堅強物。所稟固難奪。風候一參差。榮枯遂乖劣。况吾北人情。不耐南方熱。強羸壽天間。安得依時節。早祭風伯。因懷李十一舍人。

遠郡雖偏陋。時祀奉朝經。夙興祭風伯。天氣曉冥冥。導騎與從吏。引我出東坳。水霧重如雨。山火高於星。忽憶早朝日。與君趨紫庭。步登龍尾道。却望終南青。一別身向老。所思心未寧。至今想在耳。玉音尙玲玲。花下對酒二首。

藹藹江氣春。南賓閏正月。梅櫻與桃杏。次第城上發。紅芳爛簇火。素豔紛圍雪。香惜委風飄。愁牽壓枝折。



樓中老太守。頭上新白髮。冷澹痛心情。暄和好時節。故園音信斷。遠郡親賓絕。欲問花前樽。依然爲誰設。  
又一首

引手攀紅櫻。紅櫻落似霰。仰首看白日。白日走如箭。年芳與時景。頃刻猶衰變。况是血肉身。安能長強健。  
人心苦迷執。慕貴憂貧賤。愁色常在眉。歡容不上面。况吾頭半白。把鏡非不見。何必花下杯。更待他人勸。  
不二門

兩眼日將闌。四支漸衰瘦。束帶曠昔圍。穿衣妨寬袖。流年似江水。奔注無昏晝。志氣與形骸。安能長依舊。  
亦曾登玉陛。舉措多紕繆。至今金闕籍。名姓獨遺漏。亦曾燒大藥。消息乖火候。至今殘丹砂。燒乾不成就。  
行藏事兩失。憂惱心交鬪。化作顛顛翁。拋身在荒陋。坐看老病逼。須得醫王救。唯有不二門。其間無天壽。

我身

我身何所似。似彼孤生蓬。秋霜翦根斷。浩浩隨長風。昔遊秦雍間。今落巴蠻中。昔爲意氣郎。今作寂寥翁。  
外貌雖寂寞。中懷頗沖融。賦命有厚薄。委心任窮通。通當爲大鵬。舉翅摩蒼穹。窮則爲鷓鴣。一枝足自容。  
若知此道者。身窮心不窮。

哭王質夫

仙遊寺前別。別來十年餘。生別猶怏怏。死別復何如。客從梓潼來。道君死不虛。驚疑心未信。欲哭復踟蹰。  
踟蹰寢門側。聲發涕亦俱。衣上今日淚。篋中前月書。憐君古人風。重有君子儒。篇詠陶謝輩。風襟嵇阮徒。  
出身既蹇迤。生世仍須臾。誠知天至高。安得不一呼。江南有毒蟒。江北有妖狐。皆享千年壽。多於王質夫。

不知彼何德。不識此何辜。

東坡種花二首

持錢買花樹。城東坡上栽。但購有花者。不限桃杏梅。百果參雜種。千枝次第開。天時有早晚。地力無高低。紅者霞豔豔。白者雪皚皚。遊蜂遂不去。好鳥亦棲來。前有長流水。下有小平臺。時拂臺上石。一舉風前盃。花枝蔭我頭。花蕊落我懷。獨酌復獨詠。不覺月平階。巴俗不愛花。竟春無人來。唯此醉太守。盡日不能迴。

又一首

東坡春向暮。樹木今何如。漠漠花落盡。翳翳葉生初。每日領僮僕。荷鋤仍決渠。剗土壅其本。引泉溉其枯。小樹低數尺。大樹長丈餘。封植來幾時。高下齊扶疏。養樹既如此。養民亦何殊。將欲茂枝葉。必先救根株。云何救根株。勸農均賦租。云何茂枝葉。省事寬刑書。移此爲郡政。庶幾甦俗蘇。

登城東古臺

迢迢東郊上。有土青崔嵬。不知何代物。疑是巴王臺。巴歌久無聲。巴宮沒黃埃。靡靡春草合。牛羊緣四隈。我來一登眺。目極心悠哉。始見江山勢。峯壘水環迴。憑高視聽曠。向遠胸襟開。唯有故園念。時從東北來。

哭諸故人因寄元九

昨日哭寢門。今日哭寢門。借問所哭誰。無非故交親。偉卿既長往。質夫亦幽淪。屈指數年世。收涕自思身。彼皆少於我。先爲泉下人。我今頭半白。焉得身久存。好在元郎中。相識二十春。昔見君生子。今聞君抱孫。存者盡老大。逝者已成塵。早晚升平宅。開眉一見君。

郡中春宴因贈諸客

僕本儒家子。待詔金馬門。塵忝親近地。孤負聖明恩。一旦奉優詔。萬里牧遠人。可憐島夷師。自稱爲使君。身騎牂牁馬。口食塗江鱗。闔淡緋衫故。爛斑白髮新。是時歲二月。玉曆布春分。頒條示皇澤。命宴及良辰。冉冉趨府吏。蚩蚩聚州民。有如蟄蟲鳥。亦應天地春。薰草席鋪座。藤枝酒注樽。中庭無平地。高下隨所陳。蠻鼓聲坎坎。巴女舞蹲蹲。使君居上頭。掩口語衆賓。勿笑風俗陋。勿欺官府貧。蜂巢與蟻穴。隨分有君臣。

開元寺東池早春

池水暖溫暾。水清波激灑。萋萋青泥中。新蒲葉如劍。梅房小白裹。柳彩輕黃染。順氣草薰薰。適情鷗汎汎。舊遊成夢寐。往事隨陽焱。芳物感幽懷。一動平生念。

東澗種柳

野性愛栽植。植柳水中坻。乘春持斧斫。裁截而樹之。長短旣不一。高下隨所宜。倚岸埋大幹。臨流插小枝。松柏不可待。楸栲固難移。不如種此樹。此樹易榮滋。無根亦可活。成陰况非遲。三年未離郡。可以見依依。種罷水邊憩。仰頭閒自思。富貴本非望。功名須待時。不種東溪柳。端坐欲何爲。

臥小齋

朝起視事畢。晏坐飽食終。散步長廊下。退臥小齋中。拙政自多暇。幽情誰與同。孰云二千石。心如田野翁。

步東坡

朝上東坡步。夕上東坡步。東坡何所愛。愛此新成樹。種植當歲初。滋榮及春暮。信意取次栽。無行亦無數。

綠陰斜景轉。芳氣微風度。新葉鳥下來。萎花蝶飛去。閒攜斑竹杖。徐曳黃麻屨。欲識往來頻。青蕪成白路。

徵秋稅畢題郡南亭

高城直下視。蠶蠶見巴蠻。安可施政教。尙不通語言。且喜賦斂畢。幸聞閭井安。豈伊循良化。賴此豐登年。按牘既簡少。池館亦清閒。秋雨簷果落。夕鐘林鳥還。南亭日蕭灑。偃臥恣疏頑。

蚊蝮

巴徼炎毒早。三月蚊蝮生。呌膚拂不去。遠耳薨薨聲。斯物頗微細。中人初甚輕。如有膚受譖。久則瘡疖成。疖成無奈何。所要防其萌。麼蟲何足道。潛喻做人情。

登龍昌上寺望江南山懷錢舍人

騎馬出西郭。悠悠欲何之。獨上高寺去。一與白雲期。虛檻晚蕭灑。前山碧參差。忽似青龍閣。同望玉峯時。因詠松雪句。永懷鸞鶴姿。六年不相見。况乃隔榮衰。

郊下

西日照高樹。樹頭子規鳴。東風吹野水。水畔江蘼生。盡日看山立。有時尋澗行。兀兀長如此。何許似專城。

遣懷

樂往必悲生。泰來猶否極。誰言此數然。吾道何終塞。嘗求詹尹卜。拂龜竟默默。亦曾仰問天。天但蒼蒼色。自茲唯委命。名利心雙息。近日轉閒安。鄉國亦休憶。迴看世間苦。苦在求不得。我今無所求。庶離憂悲域。

歲晚

霜降水返壑。風落木歸山。冉冉歲將晏。物皆復本源。何此南遷客。五年獨未還。命運分已定。日久心彌安。亦嘗心與口。靜念私自言。去國固非樂。歸鄉未必歡。何須自生苦。捨易求其難。

負冬日

杲杲冬日出。照我屋南隅。負暄閉目坐。和氣生肌膚。初似飲醇醪。又如蟄者蘇。外融百骸暢。中適一念無。曠然忘所在。心與虛空俱。

委順

山城雖荒蕪。竹樹有嘉色。郡俸誠不多。亦足充衣食。外累由心起。心寧累自息。尚欲忘家鄉。誰能算官職。宜懷齊遠近。委順隨南北。歸去誠可憐。天涯住亦得。

宿溪翁

衆心愛金玉。衆口貪酒肉。何此溪上翁。飲瓢亦自足。溪南刈薪草。溪北修牆屋。歲種一頃田。春驅兩黃犢。於中甚安適。此外無營欲。溪畔偶相逢。庵中遂同宿。辭翁向朝市。問我何官祿。虛言笑殺翁。郎官應列宿。重過壽泉憶與楊九別時因題店壁

商州南十里。有水名壽泉。湧出石崖下。流經山店前。憶昔相送日。我去君言還。寒波與老淚。此地共潺湲。一去歷萬里。再來經六年。形容已變改。處所猶依然。他日君過此。殷勤吟此篇。

西掖早秋直夜書意 自此後中書舍人時作

涼風起禁掖。新月生宮沼。夜半秋暗來。萬年枝嫋嫋。炎涼遞時節。鍾鼓交昏曉。遇聖惜年衰。報恩愁力小。

素飡無補益。朱綬虛纏繞。冠蓋栖野雲。稻粱養山鳥。量力私自省。所得已非少。五品不爲賤。五十不爲夭。若無知足心。貪求何日了。

庭松

堂下何所有。十松當我階。亂立無行次。高下亦不齊。高者三丈長。下者十尺低。有如野生物。不知何人栽。接以青瓦屋。承之白沙臺。朝昏有風月。燥溼無塵泥。疏韻秋撼撼。涼陰夏淒淒。春深微雨夕。滿葉珠灌漑。歲暮大雪天。壓枝玉噤噤。四時各有趣。萬木非其儕。去年買此宅。多爲人所哈。一家二十口。移轉就松來。移來有何得。但得煩襟開。卽此是益友。豈必交賢才。願我唯俗士。冠帶走塵埃。未稱爲松主。時時一愧懷。

竹窗

嘗愛輞川寺。竹窗東北廊。一別十餘載。見竹未曾忘。今春二月初。卜居在新昌。未暇作廢庫。且先營一堂。開窗不糊紙。種竹不依行。意取北簷下。窗與竹相當。遠屋聲浙浙。逼人色蒼蒼。烟通香藹氣。月透玲瓏光。是時三伏天。天氣熱如湯。獨此竹窗下。朝迴解衣裳。輕紗一幅巾。小簾六尺牀。無客盡日靜。有風終夜涼。乃知前古人。言事頗諳詳。清風北窗臥。可以傲羲皇。

同韓侍郎遊鄭家池吟詩小飲

野艇容三人。晚池流浹浹。悠然倚棹坐。水思如江海。宿雨洗沙塵。晴風蕩烟藹。殘陽上竹樹。枝葉生光彩。我本偶然來。景物如相待。白鷗驚不起。綠芡行堪採。齒髮雖已衰。性靈未云改。逢詩遇盃酒。尙有心情在。

晚歸有感

朝弔李家孤。暮問崔家疾。迴馬獨歸來。低眉心鬱鬱。平生所善者。多不過六七。如何十年間。零落三無一。劉曾夢中見。元向花前失。漸老與誰遊。春城好風日。

曲江感秋二首 并序

元和二年三年四年。予每歲有曲江感秋詩。凡三篇。編在第七集卷。是時予爲左拾遺翰林學士。無何。貶江州司馬忠州刺史。前年遷主客郎中知制誥。未周歲。授中書舍人。今遊曲江。又值秋日。風物不改。人事屢變。况予中否後遇。昔壯今衰。慨然感懷。復有此作。噫。人生多故。不知明年秋。又何許也。時二年七月十日云耳。

元和二年秋。我年三十七。長慶二年秋。我年五十一。中間十四年。六年居譴黜。窮通與榮悴。委運隨外物。遂師廬山遠。重弔湘江屈。夜聽竹枝愁。秋看灑堆沒。近辭巴郡印。又乘綸闈筆。晚遇何足言。白髮映朱紱。銷沈昔意氣。改換舊容質。獨有曲江秋。風烟如往日。

又一首

疏蕪南岸草。蕭颯西風樹。秋到來幾時。蟬聲又無數。莎平綠茸合。蓮落青房露。今日臨望時。往年感秋處。池中水依舊。城上山如故。獨我鬢間毛。昔黑今垂素。榮名與壯齒。相避如朝暮。時命始欲來。年顏已先去。當春不歡樂。臨老徒驚誤。故作詠懷詩。題於曲江路。

翫松竹二首

龍蛇隱大澤。麋鹿遊豐草。栖鳳安於梧。潛魚樂於藻。吾亦愛吾廬。廬中樂吾道。前松後脩竹。偃臥可終老。

各附其所安。不知他物好。  
坐愛前簷前。臥愛北窗北。窗竹多好風。簷松有嘉色。幽懷一以合。俗念隨緣息。在爾雖無情。於予卽有得。  
乃知性相近。不必動與植。

衰病無趣因吟所懷

朝食多不飽。夜臥常少睡。自覺寢食間。都無少年味。平生好詩酒。今亦將捨棄。酒唯下藥飲。無復曾歡醉。  
詩多聽人吟。自不題一字。病姿引衰相。日夜相繼至。况當尙少朝。彌慚居近侍。終當求一郡。聚少漁樵費。  
合口便歸山。不問人間事。

逍遙詠

亦莫戀此身。亦莫厭此身。此身何足戀。萬劫煩惱根。此身何足厭。一聚虛空塵。無戀亦無厭。始是逍遙人。

卷十二

感傷四 歌行曲引 雜言 凡二十九首

短歌行

曛曛太陽如火色。上行千里下一刻。出爲白晝入爲夜。圓轉如珠住不得。住不得。可奈何。爲君舉酒歌短  
歌。歌聲苦。詞亦苦。四座少年君聽取。今夕未竟明夕催。秋風纔往春風迴。人無根蒂時不駐。朱顏白日相  
隳頽。勸君且強笑。一面勸君復強飲。一盃人生不得長歡樂。年少須臾老到來。



生離別

食鹽不易食梅難。鹽能苦兮梅能酸。未如生別之爲難。苦在心兮酸在肝。晨雞再鳴殘月沒。征馬連嘶行人出。回看骨肉哭一聲。梅酸鹽苦甘如蜜。河水白。黃雲秋。行人河邊相對愁。天寒路曠何處宿。棠梨葉戰風颼颼。生離別。生離別。憂從何來無斷絕。憂極心勞血氣衰。末年三十生白髮。

浩歌行

天長地久無終畢。昨夜今朝又明日。鬢髮蒼浪牙齒疏。不覺身年四十七。前去五十有幾年。把鏡照面心茫然。既無長繩繫白日。又無大藥駐朱顏。朱顏日漸不如故。青史功名在何處。欲留年少待富貴。富貴不來年少去。去復去兮如長河。東流赴海無迴波。賢愚貴賤同歸盡。北邙塚墓高嵯峨。古來如此非獨我。未死有酒且酣歌。顏回短命伯夷餓。我今所得亦已多。功名富貴須待命。命若不來知奈何。

王夫子

王夫子。送君爲一尉。東南三千五百里。道途雖遠位雖卑。月俸猶堪活妻子。男兒口讀古人書。束帶斂手來從事。近將徇祿給一家。遠則行道佐時理。行道佐時須待命。委身下位無爲恥。命苟未來且求食。官無高卑及遠邇。男兒上旣未能濟天下。下又不至飢寒死。吾觀九品至一品。其間氣味都相似。紫綬朱紱青布衫。顏色不同而已矣。王夫子。別有一事欲勸君。遇酒逢春且歡喜。

江南遇天寶樂叟

白頭病叟泣且言。祿山未亂入梨園。能彈琵琶和法曲。多在華清隨至尊。是時天下太平久。年年十月坐

朝元千官起居環珮合。萬國會同車馬奔。金鈿照耀石甕寺。蘭麝薰煖温湯源。貴妃宛轉侍君側。體弱不勝珠翠繁。冬雪飄飄錦袍煖。春風蕩漾霓裳翻。歡娛未足燕寇至。弓勁馬肥胡語喧。幽土人遷避夷狄。鼎湖龍去哭軒轅。從此漂淪到南土。萬人死盡一身存。秋風江上浪無限。暮雨舟中酒一樽。涸魚久失風波勢。枯草曾沾雨露恩。我自秦來君莫問。驪山渭水如荒村。新豐樹老籠明月。長生殿闔鎖黃昏。紅葉紛紛蓋欵瓦。綠苔重重封壞垣。惟有中官作宮使。每年寒食一開門。

送張山人歸嵩陽

黃昏慘慘天微雪。修行坊西鼓聲絕。張生馬瘦衣且單。夜扣柴門與我別。魏君冒寒來別我。爲君沽酒張燈火。酒酣火煖與君言。何事入關又出關。答云前年偶下山。四十餘月客長安。長安古來名利地。空手無金行路難。朝遊九城陌。肥馬輕車欺殺客。暮宿五侯門。殘茶冷酒愁殺人。春明門前便是嵩山路。幸有雲泉容此身。明日辭君且歸去。

醉後走筆酬劉五主簿長句之贈兼簡張大賈二十四先輩昆季

劉兄文高行孤立。十五年前名翕習。是時相遇在符離。我年二十君三十。得意忘年心迹親。寓居同縣日知聞。衡門寂寞朝尋我。古寺蕭條暮訪君。朝來暮去多攜手。窮巷貧居何所有。秋燈夜寫聯句詩。春雪朝傾煖寒酒。陴湖綠愛白鷗飛。灑水清憐紅鯉肥。偶語閒攀芳樹立。相扶醉踏落花歸。張賈弟兄同里巷。乘閒數數來相訪。雨天連宿草堂中。月夜徐行石橋上。我年漸長忽自驚。鏡中冉冉鬢鬚生。心畏後時同勵志。身牽前事各求名。問我栖栖何所適。鄉人薦爲鹿鳴客。二千里別謝交遊。三十韻詩慰行役。出門可憐

惟一身。弊裘瘦馬入咸秦。琴琴銜鼓紅塵闌。晚到長安無主人。二賈二張與余弟。驅車邈迤來相繼。操詞握賦爲干戈。鋒銳森然勝氣多。齊入文場同苦戰。五人十載九登科。二張得雋名居甲。美退爭雄重告捷。棠棣輝榮並桂枝。芝蘭芬馥和荆葉。惟有沅犀屈未伸。握中自謂駭雞珍。三年不鳴鳴必大。豈獨駭雞當駭人。元和運啓千年聖。同遇明時余最幸。始辭祕閣吏王畿。遽列諫垣升禁闈。蹇步何堪鳴珮玉。衰容不稱著朝衣。閭闔晨開朝百辟。冕旒不動香煙碧。步登龍尾上虛空。立去天顏無咫尺。宮花似雪從乘輿。禁月如霜坐直廬。身賤每驚隨內宴。才微常愧草天書。晚松寒竹新昌第。職居密近門多閉。日暮銀臺下直迴。故人到門門暫開。迴頭下馬一相顧。塵土滿衣何處來。斂手炎涼敍未畢。先說舊山今悔出。岐陽旅宦少歡娛。江左羈遊費時日。贈我一篇行路吟。吟之句句披沙金。歲月徒催白髮貌。泥塗不屈青雲心。誰會茫茫天地意。短才獲用長才棄。我隨鷓鴣鷺入煙雲。謬上丹墀爲近臣。君同鸞鳳棲荆棘。猶着青袍作選人。惆悵知賢不能薦。徒爲出入蓬萊殿。月慚諫紙二百張。歲愧俸錢三十萬。大底浮榮何足道。幾度相逢卽身老。且傾斗酒慰羈愁。重話符離問舊遊。北巷鄰居幾家去。東林舊院何人住。武里村花落復開。流溝山色應如故。感此酬君千字詩。醉中分手又何之。須知通塞尋常事。莫歎浮沉先後時。慷慨臨歧重相勉。殷勤別後加飧飯。君不見買臣衣錦還故鄉。五十身榮未爲晚。

和錢員外答盧員外早春獨遊曲江見寄長句

春來有色闌融融。先到詩情酒思中。柳岸霏微裊塵雨。杏園澹蕩開花風。聞君獨遊心鬱鬱。薄晚新晴騎馬出。醉思詩侶有同年。春歎翰林無暇日。雲夫首唱寒玉音。蔚章繼和春愁吟。此時我亦閉門坐。一日風

光三處心。

東墟晚歇 時退居渭村

涼風冷露蕭索天。黃蒿紫菊荒涼田。遶塚秋花少顏色。細蟲小蝶飛翻翻。中有騰騰獨行者。手拄漁竿不騎馬。晚從南澗釣魚迴。歇此墟中白楊下。褐衣半故白髮新。人逢知我是何人。誰言渭浦栖遲客。曾作甘泉侍從臣。

客中月

客從江南來。來時月上弦。悠悠行旅中。三見清光圓。曉隨殘月行。夕與新月宿。誰謂月無情。千里遠相逐。朝發渭水橋。暮入長安陌。不知今夜月。又作誰家客。

挽歌詞

丹旆何飛揚。素驂亦悲鳴。晨光照閭巷。轡車儼欲行。蕭條九月天。哀挽出重城。借問送者誰。妻子與弟兄。蒼蒼上古原。峨峨開新塋。含酸一慟哭。異口同哀聲。舊壠轉蕪絕。新墳日羅列。春風草綠北邙山。此地年年生死別。

長相思

九月西風興。月冷霜華凝。思君秋夜長。一夜魂九升。二月東風來。草拆花心開。思君春日遲。一夜腸九迴。妾住洛橋北。君住洛橋南。十五卽相識。今年二十三。有如女蘿草。生在松之側。蔓短枝苦高。縈迴上不得。人言人有願。願至天必成。願作遠方獸。步步比肩行。願作深山木。枝枝連理生。

山鷓鴣

山鷓鴣。朝朝暮暮啼復啼。啼時露白風淒淒。黃茅岡頭秋日晚。苦竹嶺下寒月低。畚田有粟何不啄。石楠有枝何不棲。迢迢不緩復不急。樓上舟中夜闌入。夢鄉遷客展轉臥。抱兒寡婦彷徨立。山鷓鴣。爾本此鄉鳥。生不辭巢不別羣。何苦聲聲啼到曉。啼到曉。唯能愁北人。南人慣聞如不聞。

放旅鴈 元和十年冬作

九江十年冬大雪。江水生冰樹枝折。百鳥無食東西飛。中有旅鴈聲最飢。雪中啄草冰上宿。翅冷騰空飛動遲。江童持網捕將去。手攜入市生賣之。我本北人今譴謫。人鳥雖殊同是客。見此客鳥傷客人。贖汝放汝飛入雲。鴈鴈汝飛向何處。第一莫飛西北去。淮西有賊討未平。百萬甲兵久屯聚。官軍賊軍相守老。食盡兵窮將及汝。健兒飢餓射汝喫。拔汝翅翎爲箭羽。

送春歸 元和十一年三月十一日作

送春歸三月盡。日日暮時。去年杏園花飛御溝綠。何處送春曲江曲。今年杜鵑花落子規啼。送春何處西江西。帝城送春猶快快。天涯送春能不加惆悵。莫惆悵。送春人。冗員無替五年罷。應須准擬再送潯陽春。五年炎涼凡十變。又知此身健不健。好去今年江上春。明年未死還相見。

山石榴寄元九

山石榴。一名山躑躅。一名杜鵑花。杜鵑啼時花撲撲。九江三月杜鵑來。一聲催得一枝開。江城上。閒無事。山下斲得廳前栽。爛熳一欄十八樹。根株有數花無數。千芳萬葉一時新。嫩紫殷紅鮮麴塵。淚痕裊損燕

支臉。剪刀裁破紅綃巾。謫仙初墮愁在世。姹女新嫁嬌泥春。日射血珠將滴地。風翻火焰欲燒人。閑折兩枝持在手。細看不似人間有。花中此物似西施。芙蓉芍藥皆嫫母。奇芳絕豔別者誰。通州遷客元拾遺。拾遺初貶江陵去。去時正值青春暮。商山秦嶺愁殺君。山石榴花紅夾路。題詩報我何所云。苦云色似石榴裙。當時叢畔唯思我。今日欄前只憶君。憶君不見坐銷落。日西風起紅紛紛。

畫竹歌 并引

協律郎蕭悅善畫竹。舉時無倫。蕭亦甚自祕重。有終歲求其一竿一枝而不得者。知予天與好事。忽寫一十五竿。惠然見投。予厚其意。高其藝。無以答貺。作歌以報之。凡一百八十六字云。

植物之中竹難寫。古今雖畫無似者。蕭郎下筆獨逼真。丹青以來唯一人。人畫竹身肥擁腫。蕭畫竹莖瘦節竦。人畫竹梢死羸垂。蕭畫竹枝活葉動。不根而生從意生。不筍而成由筆成。野塘水邊碕岸側。森森兩叢十五莖。嬋娟不失筠粉態。蕭颯盡得風煙情。舉頭忽看不似畫。低耳靜聽疑有聲。西叢七莖勁而健。省向天竺寺前石上見。東叢八莖疏且寒。憶曾湘妃廟裏雨中看。幽姿遠思少人別。與君相顧空長歎。蕭郎蕭郎老可惜。手戰眼昏頭雪白。自言便是絕筆時。從今此竹尤難得。

真娘墓

真娘墓。虎丘道。不識真娘鏡中面。惟見真娘墓頭草。霜摧桃李風折蓮。真娘死時猶少年。脂膚羨手不牢固。世間有物難留連。難留連。易銷歇。塞北花。江南雪。

長恨歌傳 前進士陳鴻撰

開元中。秦階平。四海無事。玄宗在位歲久。倦于下食宵衣。政無小大。始委于右丞相。深居遊宴。以聲色自娛。先是元獻皇后武淑妃皆有寵。相次卽世。宮中雖良家子千數。無可悅目者。上心忽忽不樂。時每歲十月。駕幸華清宮。內外命婦。燿燿景從。浴日餘波。賜以湯沐。春風靈液。澹蕩其間。上心油然而有顧遇。左右前後。粉色如土。詔高力士潛搜外宮。得弘農楊玄琰女于壽邸。旣笄矣。鬢髮膩理。纖穠中度。舉止閑冶。如漢武帝李夫人。別疏湯泉。詔賜澡瑩。旣出水。體弱力微。若不任羅綺。光彩煥發。轉動照人。上甚悅。進見之日。奏霓裳羽衣曲以導之。定情之夕。授金釵鈿合以固之。又命戴步搖垂金璫。明年。冊爲貴妃。半后服用。繇是冶其容。敏其詞。婉孌萬態。以中上意。上益嬖焉。時省風九州。泥金五岳。驪山雪夜。上陽春朝。與上行同室。宴專席。寢專房。雖有三夫人。九嬪。二十七世婦。八十一御妻。暨後宮才人。樂府妓女。使天子無顧眄意。自是六宮無復進幸者。非徒殊豔尤態致是。蓋才智明慧。善巧便佞。先意希旨。有不可形容者。叔父昆弟。皆列在清貴。爵爲通侯。姊妹封國夫人。富埒王室。車服邸第。與大長公主侔。而恩澤勢力。則又過之。出入禁門不問。京師長吏。爲之側目。故當時謠詠有云。生女勿悲酸。生兒勿喜歡。又曰。男不封侯女作妃。看女却爲門上楣。其人心羨慕如此。天寶末。兄國忠盜丞相位。愚弄國柄。及安祿山引兵嚮闕。以討楊氏爲辭。潼關不守。翠華西幸。出咸陽道。次馬嵬亭。六軍徘徊。持戟不進。從官郎吏。伏上馬前。請誅錯。以謝天下。國忠奉鸞纓盤水。死於道周。左右之意未快。上問之。當時敢言者。請以貴妃塞天下怒。上知不免。而不忍見其死。反袂掩面。使牽之而去。蒼黃展轉。竟就絕於尺組之下。旣而玄宗狩成都。肅宗受禪靈武。明年。大兇歸元。大駕還都。尊玄宗爲太上皇。就養南宮。遷于西內。時移事去。樂盡悲來。每至春之日。冬之夜。池蓮

夏開宮槐秋落梨園弟子。玉琯發音。聞霓裳羽衣一聲。則天顏不怡。左右斂容。三載一意。其念不衰。求之夢魂。杳不能得。適有道士自蜀來。知上皇心念楊妃如是。自言有李少君之術。玄宗大喜。命致其神。方士乃竭其術以索之。不至。又能遊神馭氣。出天界。沒地府。以求之。不見。又旁求四虛上下。東極大海。跨蓬壺。見最高仙山上。多樓闕。西廂下有洞戶。東嚮。闔其門。署曰玉妃太真院。方士抽簪叩扉。有雙童女出。應門。方士造次未及言。而雙鬟復入。俄有碧衣侍女又至。詰其所從。方士因稱唐天子使者。且致其命。碧衣云。玉妃方寢。請少待之。于時雲海沉沉。洞天日晚。瓊戶重闔。悄然無聲。方士屏息斂足。拱手門下。久之。而碧衣迎入。且曰。玉妃出。見一人冠金蓮。披紫綃。珮紅玉。曳鳳鳥。左右侍者七八人。揖方士。問皇帝安否。次問天寶十四年已還事。言訖憫默。指碧衣取金釵鈿合。各析其半。授使者曰。爲謝太上皇。謹獻是物。尋舊好也。方士受辭與信。將行。色有不足。玉妃固徵其意。復前跪致詞。請當時一事不爲他人聞者。驗於太上皇。不然。恐鈿合金釵。負新垣平之詐也。玉妃茫然退立。若有所思。徐而言之曰。昔天寶十載。侍輦避暑驪山宮。秋七月。牽牛織女相見之夕。秦人風俗。是夜張錦繡。陳飲食。樹瓜華。焚香于庭。號爲乞巧。宮掖間尤尙之。夜殆半。休侍衛於東西廂。獨侍上。上凭肩而立。因仰天感牛女事。密相誓心。願世世爲夫婦。言畢。執手各嗚咽。此獨君王知之耳。因自悲曰。由此一念。又不得居此。復墮下界。且結後緣。或爲天。或爲人。決再相見。好合如舊。因言太上皇亦不久人間。幸惟自安。無自苦耳。使者還奏太上皇。皇心震悼。日日不豫。其年夏四月。南宮晏駕。元和元年冬十二月。太原白樂天自校書郎尉于藍屋。鴻與琅邪王質夫家。于是邑暇日。相攜遊仙遊寺。話及此事。相與感歎。質夫舉酒於樂天前曰。夫希代之事。非遇出世之才。潤色之。則與



時消沒。不聞于世。樂天深於詩。多於情者也。試爲歌之。如何。樂天因爲長恨歌。意者不但感其事。亦欲懲尤物。窒亂階。垂於將來也。歌旣成。使鴻傳焉。世所不聞者。予非開元遺民。不得知。世所知者。有玄宗本紀在。今但傳長恨歌云爾。

漢皇重色思傾國。御宇多年求不得。楊家有女初長成。養在深閨人未識。天生麗質難自棄。一朝選在君王側。迴眸一笑百媚生。六宮粉黛無顏色。春寒賜浴華清池。溫泉水滑洗凝脂。侍兒扶起嬌無力。始是新承恩澤時。雲鬢花顏金步搖。芙蓉帳暖度春宵。春宵苦短日高起。從此君王不早朝。承歡侍宴無闕暇。春從春遊夜專夜。後宮佳麗三千人。三千寵愛在一身。金屋妝成嬌侍夜。玉樓宴罷醉和春。姊妹弟兄皆列土。可憐光彩生門戶。遂令天下父母心。不重生男重生女。驪宮高處入青雲。仙樂風飄處處聞。緩歌縵舞凝絲竹。盡日君王看不足。漁陽鼙鼓動地來。驚破霓裳羽衣曲。九重城闕煙塵生。千乘萬騎西南行。翠華搖搖行復止。西出都門百餘里。六軍不發無奈何。宛轉蛾眉馬前死。花鈿委地無人收。翠翹金雀玉搔頭。君王掩面救不得。迴看血淚相和流。黃埃散漫風蕭索。雲棧縈紆登劍閣。峨嵋山下少人行。旌旗無光日色薄。蜀江水碧蜀山青。聖主朝朝暮暮情。行宮見月傷心色。夜雨聞鈴腸斷聲。天旋日轉迴龍馭。到此躊躇不能去。馬嵬坡下泥土中。不見玉顏空死處。君臣相顧盡霑衣。東望都門信馬歸。歸來池苑皆依舊。太液芙蓉未央柳。芙蓉如面柳如眉。對此如何不淚垂。春風桃李花開日。秋雨梧桐葉落時。西宮南苑多秋草。落葉滿階紅不掃。梨園弟子白髮新。椒房阿監青娥老。夕殿螢飛思悄然。孤燈挑盡未成眠。遲遲鐘鼓初長夜。耿耿星河欲曙天。鴛鴦瓦冷霜華重。翡翠衾寒誰與共。悠悠生死別經年。魂魄不曾來入夢。臨邛

道士鴻都客。能以精誠致魂魄。爲感君王展轉思。遂教方士殷勤覓。排空馭氣奔如電。昇天入地求之遍。上窮碧落下黃泉。兩處茫茫皆不見。忽聞海上有仙山。山在虛無縹緲間。樓閣玲瓏五雲起。其中綽約多仙子。中有一人字玉真。雪膚花貌參差是。金闕西廂叩玉扃。轉教小玉報雙成。聞道漢家天子使。九華帳裏夢魂驚。攬衣推枕起徘徊。珠箔銀屏迤邐開。雲鬢半垂新睡覺。花冠不整下堂來。風吹仙袂飄飄舉。猶似霓裳羽衣舞。玉容寂寞淚闌干。梨花一枝春帶雨。含情凝睇謝君王。一別音容兩渺茫。昭陽殿裏恩愛絕。蓬萊宮中日月長。迴頭下望人寰處。不見長安見塵霧。惟將舊物表深情。鈿合金釵寄將去。鈿留一股合一扇。釵擘黃金合分鈿。但令心似金鈿堅。天上人間會相見。臨別殷勤重寄詞。詞中有誓兩心知。七月七日長生殿。夜半無人私語時。在天願作比翼鳥。在地願爲連理枝。天長地久有時盡。此恨綿綿無盡期。

婦人苦

蟬鬢加意梳。蛾眉用心掃。幾度曉粧成。君看不言好。妾身重同穴。君意輕偕老。惆悵去年來。心知未能道。今朝一開口。語少意何深。願引他時事。移君此日心。人言夫婦親。義合如一身。及至死生際。何曾苦樂均。婦人一喪夫。終身守孤子。有如林中竹。忽被風吹折。一折不重生。枯死猶抱節。男兒若喪婦。能不暫傷情。應似門前柳。逢春易發榮。風吹一枝折。還有一枝生。爲君委曲言。願君再三聽。須知婦人苦。從此莫相輕。

長安道

花枝缺處青樓開。豔歌一曲酒一盃。美人勸我急行樂。自古朱顏不再來。君不見外州客。長安道。一回來。一迴老。

潛別離

不得哭。潛別離。不得語。暗相思。兩心之外無人知。深籠夜鏢獨棲鳥。利劍春斷連理枝。河水雖濁有清日。烏頭雖黑有白時。唯有潛離與暗別。彼此甘心無後期。

隔浦蓮

隔浦愛紅蓮。昨日看猶在。夜來風吹落。只得一迴採。花開雖有明年期。復愁明年還暫時。

寒食野望吟

丘墟郭門外。寒食誰家哭。風吹曠野紙錢飛。古墓纍纍春草綠。棠梨花映白楊樹。盡是死生離別處。冥寞重泉哭不聞。蕭蕭暮雨人歸去。

琵琶引 并序

元和十年。予左遷九江郡司馬。明年秋。送客湓浦口。聞舟船中夜彈琵琶者。聽其音。錚錚然有京都聲。問其人。本長安倡女。嘗學琵琶於穆曹二善才。年長色衰。委身爲賈人婦。遂命酒使快彈數曲。曲罷憫默。自敘少小時歡樂事。今漂淪憔悴。轉徙於江湖間。予出官二年。恬然自安。感斯人言。是夕始覺有遷謫意。因爲長句歌以贈之。凡六百一十二言。命曰琵琶行。

潯陽江頭夜送客。楓葉荻花秋索索。主人下馬客在船。舉酒欲飲無管絃。醉不成歡慘將別。別時茫茫江浸月。忽聞水上琵琶聲。主人忘歸客不發。尋聲闌問彈者誰。琵琶聲停欲語遲。移船相近邀相見。添酒迴燈重開宴。千呼萬喚始出來。猶抱琵琶半遮面。轉軸撥絃三兩聲。未成曲調先有情。絃絃掩抑聲聲思。似

訴平生不得意。低眉信手續續彈。說盡心中無限事。輕攏慢撚抹復挑。初爲霓裳後綠腰。大絃嘈嘈如急雨。小絃切切如私語。嘈嘈切切錯雜彈。大珠小珠落玉盤。間關鶯語花底滑。幽咽泉流冰下灘。冰泉冷澀絃凝絕。凝絕不通聲暫歇。別有幽愁暗恨生。此時無聲勝有聲。銀瓶乍破水漿迸。鐵騎突出刀槍鳴。曲終收撥當心畫。四絃一聲如裂帛。東船西舫悄無言。唯見江心秋月白。沉吟放撥插絃中。整頓衣裳起斂容。自言本是京城女。家在蝦蟆陵下住。十三學得琵琶成。名屬教坊第一部。曲罷曾教善才伏。粧成每被秋娘妬。五陵年少爭纏頭。一曲紅綃不知數。鈿頭雲篋擊節碎。血色羅裙飜酒汗。今年歡笑復明年。秋月春風等閑度。弟走從軍阿姨死。暮去朝來顏色故。門前冷落鞍馬稀。老大嫁作商人婦。商人重利輕別離。前月浮梁買茶去。去來江口守空船。遶船月明江水寒。夜深忽夢少年事。夢啼粧淚紅闌干。我聞琵琶已歎息。又聞此語重唧唧。同是天涯淪落人。相逢何必曾相識。我從去年辭帝京。謫居臥病潯陽城。潯陽小處無音樂。終歲不聞絲竹聲。住近湓江地低溼。黃蘆苦竹繞宅生。其間旦暮聞何物。杜鵑啼血猿哀鳴。春江花朝秋月夜。往往取酒還獨傾。豈無山歌與村笛。嘔啞嘲哢難爲聽。今夜聞君琵琶語。如聽仙樂耳暫明。莫辭更坐彈一曲。爲君翻作琵琶行。感我此言良久立。却坐促絃絃轉急。淒淒不似向前聲。滿座重聞皆掩泣。就中泣下誰最多。江州司馬青衫溼。

簡簡吟

蘇家小女名簡簡。芙蓉花腮柳葉眼。十一把鏡學點粧。十二抽針能繡裳。十三行坐事調品。不肯迷頭白地藏。玲瓏雲鬢生菜樣。飄飄風袖薔薇香。殊姿異態不可狀。忽忽轉動如有光。二月繁霜殺桃李。明年欲

嫁今年死。丈人阿母勿悲啼。此女不是凡夫妻。恐是天仙謫人世。只合人間十三歲。大都好物不堅牢。彩雲易散琉璃脆。

花非花

花非花。霧非霧。夜半來。天明去。來如春夢幾多時。去似朝雲無覓處。

醉後狂言酬贈蕭殷二協律

餘杭邑客多羈貧。其間甚者蕭與殷。天寒身上猶衣葛。日高甌中未拂塵。江城山寺十一月。北風吹砂雪紛紛。賓客不見緜袍惠。黎庶未霑襦袴恩。此時太守自慚愧。重衣複衾有餘溫。因命染人與針女。先製兩裘贈二君。吳縣細軟桂布密。柔如狐腋白似雲。勞將詩書投贈我。如此小惠何足論。我有大裘君未見。寬廣和煖如陽春。此裘非繪亦非纈。裁以法度絮以仁。刀尺鈍拙製未畢。出亦不獨裹一身。若令在郡得五考。與君展覆杭州人。

醉歌

罷胡琴。掩秦瑟。玲瓏再拜歌初畢。誰道使君不解歌。聽唱黃雞與白日。黃雞催曉丑時鳴。白日催年酉前沒。腰間紅綬繫未穩。鏡裏朱顏看已失。玲瓏玲瓏奈老何。使君歌了汝更歌。

卷十三

律詩 五言 七言 自兩韻至一百韻 凡九十九首

代書詩一百韻寄微之

憶在貞元歲。初登典校司。身名同日授。心事一言知。肺腑都無隔。形骸兩不羈。疎狂屬年少。閑散爲官卑。分定金蘭契。言通藥石規。交賢方汲汲。友直每僂僂。有月多同賞。無盃不共持。秋風拂琴匣。夜雪卷書帷。高上慈恩塔。幽尋皇子陂。唐昌玉蕊會。崇敬牡丹期。笑勸遷辛酒。閑吟短李詩。儒風愛敦質。佛理尙玄師。度日曾無悶。通宵靡不爲。雙聲聯律句。八面對宮棋。往往遊三省。騰騰出九逵。寒銷直城路。春到曲江池。樹暖枝條弱。山晴彩翠奇。峯攢石綠點。柳惹麴塵絲。岸草烟鋪地。園花雪壓枝。早光紅照耀。新溜碧透池。幄幕侵堤布。盤筵占地施。徵伶皆絕藝。選妓悉名姬。鉛黛凝春態。金鈿耀水嬉。風流誇墜髻。時世鬪啼眉。密坐隨歡促。華樽逐勝移。香飄歌袂動。翠落舞釵遺。籌插紅螺椀。觥飛白玉卮。打嫌調笑易。飲訝卷波遲。殘席諠譁散。歸鞍酩酊騎。酖顏烏帽側。醉袖玉鞭垂。紫陌傳鐘鼓。紅塵塞路歧。幾時曾暫別。何處不相隨。荏苒星霜換。迴環節候推。兩衙多請假。三考欲成資。運偶千年聖。天成萬物宜。皆當少壯日。同惜盛明時。光景嗟虛擲。雲霄竊闖闕。攻文朝矻矻。講學夜孜孜。策目穿如札。毫鋒銳若錐。繁張獲鳥網。堅守釣魚坻。並受夔龍薦。齊陳晁董詞。萬言經濟略。三道太平基。中第爭無敵。專場戰不疲。輔車排勝陣。犄角舉降旗。雙闕紛容衛。千僚儼等夷。恩隨紫泥降。名向白麻披。既在高科選。還從好爵糜。東垣君諫諍。西邑我驅馳。再喜登烏府。多慙侍赤墀。官班分內外。遊處遂參差。每列鸞鷺序。偏瞻獬豸姿。簡威霜凜冽。衣彩繡葳蕤。正色摧強禦。剛腸嫉喔咻。常憎持祿位。不擬保妻兒。養勇期除惡。輸忠在滅私。下韉驚燕雀。當道惱狐狸。南國人無怨。東臺吏不欺。理冤多定國。切諫甚辛毗。造次行於是。平生志在茲。道將心共直。言與行兼危。

水閣波翻覆。山藏路險巖。未爲明主識。已被倖臣疑。木秀遭風折。蘭芳遇叢萎。千鈞勢易壓。一柱力難支。騰口因成病。吹毛遂得疵。憂來吟貝錦。謫去詠江離。邂逅塵中遇。殷勤馬上辭。賈生離魏闕。王粲向荆夷。水過清源寺。山經綺季祠。心搖漢臯珮。淚墮峴亭碑。驛路綠雲際。城樓枕水湄。思鄉多繞澤。望闕獨登陴。林晚青蕭索。江平綠渺瀰。野秋鳴蟋蟀。沙冷聚鷗鷺。官舍黃茅屋。人家苦竹籬。白醪充夜酌。紅粟備晨炊。寡鶴摧風翻。鰥魚失水髻。閨雛啼且渴。涼葉墮相思。一點寒燈滅。三聲曉角吹。藍衫經雨故。驄馬臥霜羸。念涸誰濡沐。嫌醒自歎醜。耳垂無伯樂。舌在有張儀。負氣衝星劍。傾心向日葵。金言自銷鑠。玉性肯磷緇。伸屈須看變。窮通莫問龜。定知身是患。當用道爲醫。想子今如彼。嗟予獨在斯。無聊當歲杪。有夢到天涯。坐阻連襟帶。行乖接履綦。潤銷衣上霧。香散室中芝。念遠緣遷貶。驚時爲別離。素書三往復。明月七盈虧。舊里非難到。餘歡不可追。樹依興善老。草傍靜安衰。前事恩如昨。中懷寫向誰。此村尋古柏。南宅訪辛夷。此日空搔首。何人共解頤。病多知夜永。年長覺秋悲。不飲長如醉。加飧亦似飢。狂吟一千字。因使寄微之。

和鄭元及第後秋歸洛下閑居

勤苦成名後。優遊得意間。玉憐同匠琢。桂恨隔年攀。山靜豹難隱。谷幽鬢鬢還。微吟詩引步。淺酌酒開顏。門迴暮臨水。窗深朝對山。雲衢日相待。莫悞許身閑。

與諸同年賀座主侍郎新拜太常同宴肅尙書亭子

寵新卿典禮。會盛客徵文。不失遷鶯侶。因成賀燕羣。池臺晴間雪。冠蓋暮和雲。共仰曾攀處。年深桂尙薰。東都冬日會諸同年宴鄭家林亭

盛時陪上第。假日會羣賢。桂折應同樹。鶯遷各異年。賓階紛組珮。妓席儼花鈿。促膝齊貧賤。差肩次後先。助歌林下水。銷酒雪中天。他日昇沉者。無忘共此筵。

敘德書情四十韻上宣歙崔中丞

元聖生乘運。忠賢出應期。還將稽古力。助立太平基。土控吳兼越。州連歙與池。山河地襟帶。軍鎮國藩維。廉察安江甸。澄清肅海夷。股肱分外守。耳目付中司。楚老歌來暮。秦人詠去思。望如時雨至。福似歲星移。政靜民無訟。刑行吏不欺。搗謙驚主寵。陰德畏人知。白玉慚溫色。朱繩讓直辭。行爲時領袖。言作世蓍龜。盛幕招賢士。連營訓銳師。光華下鷓鴣。氣色動熊羆。出入麾幢引。登臨劍戟隨。好風迎解榻。美景待褰帷。晴野霞飛綺。春郊柳宛絲。城烏驚畫角。江鴈避紅旗。藉草朱輪駐。攀花紫綬垂。山宜謝公屐。洲稱柳家詩。酒氣和芳杜。絃聲亂子規。分毬齊馬首。列舞匝蛾眉。醉惜年光晚。歡憐日影遲。迴塘排玉棹。歸路擁金羈。自顧龍鍾者。嘗蒙嚙味之。仰山塵不讓。涉海水難爲。身忝鄉人薦。名因國士推。提攜增善價。拂拭長妍姿。射策端心術。遷喬整羽儀。幸穿楊遠葉。謬折桂高枝。佩德潛書帶。銘仁闔勒肌。飭躬趨館舍。拜手挹階墀。霄漢程雖在。風塵迹尙卑。弊衣羞布素。敗屋厭茅茨。養乏晨昏膳。居無伏臘資。盛時貧可恥。壯歲病堪嗤。擢第名方立。耽書力未疲。磨鉛重剗割。策蹇再奔馳。相馬須憐瘦。呼鷹正及飢。扶搖重借便。會有答恩時。

和渭北劉大夫借便秋遮虜寄朝中親友

巨鎮爲邦屏。全材作國楨。韜鈴漢上將。文墨魯諸生。豹虎關西卒。金湯渭北城。龍深初受檠。威重正揚兵。陣占山河布。軍諳水草行。夏苗侵部落。宵遁失蕃營。雲隊攢戈戟。風行卷旆旌。候空烽火滅。氣勝鼓鞞鳴。



胡馬辭南牧。周師罷北征。迴頭問天下。何處有樓槍。

題故曹王宅

甲第何年置。朱門此地開。山當賓閣出。溪繞妓堂迴。覆井桐新長。蔭窗竹舊栽。地荒紅菌萐。砌老綠莓苔。捐館梁王去。思人楚客來。西園飛蓋處。依舊月徘徊。

自江陵之徐州路上寄兄弟

歧路南將北。離憂弟與兄。關河千里別。風雪一身行。夕宿勞鄉夢。晨裝慘旅情。家貧憂後事。日短念前程。煙鴈翻寒渚。霜鳥聚古城。誰憐陟岡者。西楚望南荆。

酬哥舒大見贈

去歲歡遊何處去。曲江西岸杏園東。花下忘歸因美景。樽前勸酒是春風。各從微宦風塵裏。共度流年離別中。今日相逢愁又喜。八人分散兩人同。

和談校書秋夜感懷呈朝中親友

遙夜涼風楚客悲。清砧繁漏月高時。秋霜似鬢年空長。春草如袍位尚卑。詞賦擅名來已久。煙霄得路去何遲。漢庭卿相皆知已。不薦揚雄欲薦誰。

感秋寄遠

惆悵時節晚。兩情千里同。離憂不散處。庭樹正秋風。燕影動歸翼。蕙香銷故叢。佳期與芳歲。半落兩成空。

春題華陽觀

帝子吹簫逐鳳皇。空留仙洞號華陽。落花何處堪惆悵。頭白宮人掃影堂。

秋雨中贈元九

不堪紅葉青苔地。又是涼風暮雨天。莫怪獨吟秋思苦。比君校近二毛年。

城東閑遊

寵辱憂歡不到情。任他朝市自營營。獨尋秋景城東去。白鹿原頭信馬行。

答韋八

麗句勞相贈。佳期恨有違。早知留酒待。悔不趁花歸。春盡綠醅老。雨多紅蕖稀。今朝如一醉。猶得及芳菲。

華陽觀桃花時招李六拾遺飲

華陽觀裏仙桃發。把酒看花心自知。爭忍開時不同醉。明朝後日即空枝。

和友人洛中春感

莫悲金谷園中月。莫歎天津橋上春。若學多情尋往事。人間何處不傷人。

送張南簡入蜀

昨日詔書下。求賢訪陸沈。無論能與否。皆起徇名心。君獨南遊去。雲山蜀路深。

寄陸補闕

忽憶前年科第後。此時雞鶴暫同羣。秋風惆悵須吹散。雞在中庭鶴在雲。

華陽觀中八月十五日夜招友翫月

人道秋中明月好。欲邀同賞意如何。華陽洞裏秋壇上。今夜清光此處多。  
曲江憶元九

春來無伴閑遊少。行樂三分減二分。何況今朝杏園裏。閑人逢盡不逢君。  
過劉三十二故宅

不見劉君來近遠。門前兩度滿枝花。朝來惆悵宜平過。柳巷當頭第一家。  
下邳莊南桃花

村南無限桃花發。唯我多情獨自來。日暮風吹紅滿地。無人解惜爲誰開。  
三月三十日題慈恩寺

慈恩春色今朝盡。盡日徘徊倚寺門。惆悵春歸留不得。紫藤花下漸黃昏。  
看渾家牡丹花戲贈李二十

香勝燒蘭紅勝霞。城中最數令公家。人人散後君須看。歸到江南無此花。  
春中與盧四周諒華陽觀同居

性情懶慢好相親。門巷蕭條稱作鄰。背燭共憐深夜月。踏花同惜少年春。杏壇住僻雖宜病。芸閣官微不救貧。文行如君尚憔悴。不知霄漢待何人。

自城東至以詩代書戲招李六拾遺  
青門走馬趁心期。惆悵歸來已校遲。應過唐昌玉蕊後。猶當崇敬牡丹時。暫遊還憶崔先輩。欲醉先邀李

拾遺尙殘半月芸香俸。不作歸糧作酒資。

藍屋縣北樓望山 自此後詩爲畿尉時作

一爲趨走吏塵土不開顏。辜負平生眼。今朝始見山。

縣西郊秋寄贈馬造

紫閣峯西清渭東。野煙深處夕陽中。風荷老葉蕭條綠。水蓼殘花寂寞紅。我厭宦遊君失意。可憐秋思兩心同。

別韋蘇

百年愁裏過。萬感醉中來。惆悵城西別。愁眉兩不開。

戲題新栽薔薇

移根易地莫憔悴。野外庭前一種春。少府無妻春寂寞。花開將爾當夫人。

酬王十八李大見招遊山

自憐幽會心期阻。復愧嘉招書信頻。王事牽身去不得。滿山松雪屬他人。

縣南花下醉中留劉五

百歲幾迴同酌酎。一年今日最芳菲。願將花贈天台女。留取劉郎到夜歸。

宿楊家

楊氏弟兄俱醉臥。披衣獨起下高齋。夜深不語中庭立。月照藤花影上階。

醉中留別楊六兄弟

春初攜手春深散。無日花間不醉狂。別後何人堪共醉。猶殘十日好風光。  
醉中歸整屋

金光門外昆明路。半醉騰騰信馬迴。數日非關王事繫。牡丹花盡始歸來。  
遊雲居寺贈穆三十六地主

亂峯深處雲居路。共踏花行獨惜春。勝地本來無定主。大都山屬愛山人。  
和王十八薔薇澗花時有懷蕭侍御兼見贈

霄漢風塵俱是繫。薔薇花委故山深。憐君獨向澗中立。一把紅芳三處心。  
再因公事到駱口驛

今年到時夏雲白。去年來時秋樹紅。兩度見山心有愧。皆因王事到山中。  
期李二十文略王十八質夫不至獨宿仙遊寺

文略也從牽吏役。質夫何故戀羈塵。始知解愛山中宿。千萬人中無一人。  
酬趙秀才贈新登科諸先輩

莫羨蓬萊鸞鶴侶。道成羽翼自生身。君看名在丹臺者。盡是人間脩道人。  
過天門街

雪盡終南又欲春。遙憐翠色對紅塵。千車萬馬九衢上。迴首看山無一人。

惜玉蕊花有懷集賢王校書起

芳意將闌風又吹。白雲離葉雪辭枝。集賢離校無閑日。落盡瑤花君不知。

春送盧秀才下第遊太原謁嚴尚書

未將時會合。且與俗浮沉。鴻養青冥翮。蛟潛雲雨心。煙郊春別遠。風磧暮程深。墨客投何處。并州舊翰林。

長安送柳大東歸

白杜羈遊伴。青門遠別離。浮名相引住。歸路不同歸。

送文暢上人東遊

得道卽無著。隨緣西復東。貌依年臘老。心到夜蟬空。山宿馴溪虎。江行瀘水蟲。悠悠塵客思。春滿碧雲中。

社日關路作

晚景函關路。涼風社日天。青巖新有燕。紅樹欲無蟬。愁立驛樓上。厭行官堠前。蕭條秋興苦。漸近二毛年。

重到毓村宅有感

欲入中門淚滿巾。庭花無主兩迴春。軒窗簾幕皆依舊。只是堂前欠一人。

亂後過流溝寺

九月徐州新戰後。悲風殺氣滿山河。唯有流溝山下寺。門前依舊白雲多。

歎髮落

多病多愁心自知。行年未老髮先衰。隨梳落去何須惜。不落終須變作絲。

留別吳七正字

成名共記甲科上。署吏同登芸閣間。惟是塵心殊道性。秋蓬常轉水長閑。

除夜宿洛州

家寄關西住。身爲河北遊。蕭條歲除夜。旅泊在洛州。

邯鄲冬至夜思家

邯鄲驛裏逢冬至。抱膝燈前影對身。想得家中夜深坐。還應說著遠行人。

冬至夜懷湘靈

豔質無由見。寒衾不可親。何堪最長夜。俱作獨眠人。

感故張僕射諸妓

黃金不惜買蛾眉。揀得如花三四枝。歌舞教成心力盡。一朝身去不相隨。

遊仙遊山

關將心地出人間。五六年來人怪閑。自嫌戀著未全盡。猶愛雲泉多在山。

見尹公亮新詩偶贈絕句

袖裏新詩十首餘。吟看句句是瓊琚。如何持此將干謁。不及公卿一字書。

長安閑居

風竹松煙晝掩關。意中長似在深山。無人不怪長安住。何獨朝朝暮暮閑。

早春獨遊曲江

散職無羈束。羸驂少送迎。朝從直城出。春傍曲江行。風起池東暖。雲開山北晴。冰銷泉脈動。雪盡草牙生。露杏紅初坼。煙楊綠未成。影遲新度雁。聲澀欲啼鶯。閑地心俱靜。韶光眼共明。酒狂憐性逸。藥効喜身輕。慵慢疏人事。幽棲遂野情。迴看芸閣笑。不似有浮名。

祕書省中憶舊山

厭從薄宦校青簡。悔別故山思白雲。猶喜蘭臺非傲吏。歸時應免動移文。

涼夜有懷 自此後詩並未應舉時作

清風吹枕席。白露溼衣裳。好是相親夜。漏遲天氣涼。

送武士曹歸蜀

花落烏嚶嚶。南歸稱野情。月宜秦嶺宿。春好蜀江行。鄉路通雲棧。郊扉近錦城。烏臺陟岡送。人羨別時榮。

江南送北客因憑寄徐州兄弟書

故園望斷欲何如。楚水吳山萬里餘。今日因君訪兄弟。數行鄉淚一封書。

賦得古原草送別

離離原上草。一歲一枯榮。野火燒不盡。春風吹又生。遠芳侵古道。晴翠接荒城。又送王孫去。萋萋滿別情。

夜哭李夷道

逝者絕影響。空庭朝復昏。家人哀臨畢。夜鎖壽堂門。無妻無子何人葬。空見銘旌向月翻。



病中作

久爲勞生事。不學攝生道。少年已多病。此身豈堪老。

秋江晚泊

扁舟泊雲島。倚棹念鄉國。四望不見人。煙江澹秋色。客心貧易動。日入愁未息。

旅次景空寺宿幽上人院

不與人境接。寺門開向山。暮鐘鳴鳥聚。秋雨病僧閑。月隱雲樹外。螢飛廊宇間。幸投花界宿。暫得靜心顏。

長安正月十五日

誼誼車騎帝王州。羈病無心逐勝遊。明月春風三五夜。萬人行樂一人愁。

過高將軍墓

原上新墳委一身。城中舊宅有何人。妓堂賓閣無歸日。野草山花又欲春。門客空將感恩淚。白楊風裏一

霑巾。

寒食臥病

病逢佳節長歎息。春雨濛濛榆柳色。羸坐全非舊日容。扶行半是他人力。誼誼里巷踏青歸。笑閉柴門度

寒食。

宿桐廬館同崔存度醉後作

江海漂漂共旅遊。一樽相勸散窮愁。夜深醒後愁還在。雨滴梧桐山館秋。

江樓望歸

滿眼雲水色。月明樓上人。旅愁春入越。鄉夢夜歸秦。道路通荒服。田園隔虜塵。悠悠滄海畔。十載避黃巾。

除夜寄弟妹

感時思弟妹。不寐百憂生。萬里經年別。孤燈此夜情。病容非舊日。歸思逼新正。早晚重歡會。羈離各長成。

寒食月夜

風香露重梨花溼。草舍無燈愁未入。南鄰北里歌吹時。獨倚柴門月中立。

感芍藥花寄正一上人

今日階前紅芍藥。幾花欲老幾花新。開時不解比色相。落後始知如幻身。空門此去幾多地。欲把殘花問上人。

晚秋閑居

地僻門深少送迎。披衣閑坐養幽情。秋庭不掃攜藤杖。閑踏梧桐黃葉行。

秋暮郊居書懷

郊居人事少。晝臥對林巒。窮巷厭多雨。貧家愁早寒。葛衣秋未換。書卷病仍看。若問生涯計。前溪一釣竿。

爲薛台悼亡

半死梧桐老病身。重泉一念一傷神。手攜雉子夜歸院。月冷房空不見人。

途中寒食

路傍寒食行人絕。獨占春愁在路傍。馬上垂鞭愁不語。風吹百草野田香。  
題流溝寺古松

煙葉葱蘢蒼塵尾。霜皮駁落紫龍鱗。欲知松老看塵壁。死却題詩幾許人。  
感月悲逝者

存亡感月一潸然。月色今宵似往年。何處曾經同望月。櫻桃樹下後堂前。

代鄰叟言懷

人生何事心無定。宿昔如今意不同。宿昔愁身不得老。如今恨作白頭翁。

自河南經亂。關內阻飢。兄弟離散。各在一處。因望月有感。聊書所懷。寄上浮梁大兄。於潛七兄。烏江十五兄。兼示符離及下邳弟妹。

時難年饑世業空。弟兄羈旅各西東。田園寥落干戈後。骨肉流離道路中。弔影分爲千里雁。辭根散作九秋蓬。共看明月應垂淚。一夜鄉心五處同。

長安早春旅懷

軒車歌吹諠都邑。中有一人向隅立。夜深明月卷簾愁。日暮青山望鄉泣。風吹新綠草牙拆。雨灑輕黃柳條溼。此生知負少年春。不展愁眉欲三十。

寒閨夜

夜半衾裯冷。孤眠懶未能。籠香銷盡火。巾淚滴成冰。爲惜影相伴。通宵不滅燈。

寄湘靈

淚眼零寒凍不流。每經高處卽迴頭。遙知別後西樓上。應凭欄杆獨自愁。

冬至宿楊梅館

十一月中長至夜。三千里外遠行人。若爲獨宿楊梅館。冷枕單牀一病身。

臨江送夏瞻

悲君老別我霑巾。七十無家萬里身。愁見舟行風又起。白頭浪裏白頭人。

冬夜示敏巢

爐火欲銷燈欲盡。夜長相對百憂生。他時諸處重相見。莫忘今宵燈下情。

客中守歲

守歲樽無酒。思鄉淚滿巾。始知爲客苦。不及在家貧。畏老偏驚節。防愁預惡春。故園今夜裏。應念未歸人。

問淮水

自嗟名利客。擾擾在人間。何事長淮水。東流亦不閑。

宿樟亭驛

夜半樟亭驛。愁人起望鄉。月明何所見。潮水白茫茫。

及第後憶舊山

偶獻子虛登上第。却吟招隱憶中林。春蘿秋桂莫惆悵。縱有浮名不繫心。

題李次雲窗竹

不用裁爲鳴鳳管。不須截作釣魚竿。千花百草凋零後。留向紛紛雪裏看。

花下自勸酒

酒盞酌來須滿滿。花枝看卽落紛紛。莫言三十是年少。百歲三分已一分。

題李十一東亭

相思夕上松臺立。蛩思蟬聲滿耳秋。惆悵東亭風月好。主人今夜在鄜州。

春村

二月村園暖。桑間戴勝飛。農夫春舊穀。蠶妾禱新衣。牛馬因風遠。雞豚過社稀。黃昏林下路。鼓笛賽神歸。

題施山人野居

得道應無着。謀生亦不妨。春泥秧稻暖。夜火焙茶香。水巷風塵少。松齋日月長。高閑真是貴。何處覓侯王。

卷十四

律詩 五言 七言 自兩韻至一百韻 凡一百首

翰林中送獨孤二十七起居罷職出院

碧落留雲住。青冥放鶴還。銀臺向南路。從此到人間。

重尋杏園

忽憶芳時頻酌。却尋醉處重徘徊。杏花結子春深後。誰解多情又獨來。

曲江獨行 自此後在翰林時作

獨來獨去何人識。廐馬朝衣野客心。閑愛無風水邊坐。楊花不動樹陰陰。

同李十一醉憶元九

花時同醉破春愁。醉折花枝作酒籌。忽憶故人天際去。計程今日到涼州。

同錢員外題絕糧僧巨川

三十年來坐對山。唯將無事化人間。齋時往往聞鐘笑。一食何如不食閑。

絕句代書贈錢員外

欲尋秋景閑行去。君病多慵我興孤。可惜今朝山最好。強能騎馬出來無。

晚秋有懷鄭中舊隱

天高風嫋嫋。鄉思繞關河。寥落歸山夢。殷勤探蕨歌。病添心寂寞。愁入鬢蹉跎。晚樹蟬鳴少。秋階日上多。長閑羨雲鶴。久別愧烟蘿。其奈丹墀上。君恩未報何。

禁中九日對菊花酒憶元九

賜酒盈杯誰共持。宮花滿把獨相思。相思只傍花邊立。盡日吟君詠菊詩。

送王十八歸山寄題仙遊寺

曾於太白峯前住。數到仙遊寺裏來。黑水澄時潭底出。白雲破處洞門開。林間煖酒燒紅葉。石上題詩掃

綠苔。惆悵舊遊無復到。菊花時節羨君迴。

答張籍因以代書

憐君馬瘦衣裘薄。許到江東訪鄙夫。今日正閑天又暖。可能扶病暫來無。

曲江早春

曲江柳條漸無力。杏園伯勞初有聲。可憐春淺遊人少。好傍池邊下馬行。

見元九悼亡詩因以此寄

夜淚闌銷明月幌。春腸遙斷牡丹庭。人間此病治無藥。唯有楞伽四卷經。

寒食夜

無月無燈寒食夜。夜深猶立闌花前。忽因時節驚年幾。四十如今欠一年。

杏園花落時招錢員外同醉

花園欲去去應遲。正是風吹狼藉時。近西數樹猶堪醉。半落春風半在枝。

重題西明寺牡丹

往年君向東都去。曾歎花時君未迴。今年況作江陵別。惆悵花前又獨來。只愁離別長如此。不道明年花不開。

同錢員外禁中夜直

宮漏三聲知半夜。好風涼月滿松筠。此時閑坐寂無語。藥樹影中惟兩人。

禁中夜作書與元九

心緒萬端書兩紙。欲封重讀意遲遲。五聲宮漏初明後。一點窗燈欲滅時。

八月十五日夜禁中獨直對月憶元九

銀臺金闕夕沉沉。獨宿相思在翰林。三五夜中新月色。二千里外故人心。渚宮東面煙波冷。浴殿西頭鐘漏深。猶恐清光不同見。江陵卑溼足秋陰。

寄陳式五兄

年來白髮兩三莖。憶別君時鬢未生。惆悵料君應滿鬢。當初是我十年兄。

庾順之以紫霞綺遠贈以詩答之

千里故人心鄭重。一端香綺紫氛氲。開緘日映晚霞色。滿幅風生秋水文。爲擘欲裁憐葉破。製裘將翦惜花分。不如縫作合歡被。寤寐相思如對君。

送元八歸鳳翔

莫道岐州三日程。其如風雪一身行。與君况是經年別。暫到城來又出城。

雨雪放朝因懷微之

歸騎紛紛滿九衢。放朝三日爲泥塗。不知雨雪江陵府。今日排衙得免無。

詠懷

歲去年來塵土中。眼看變作白頭翁。如何辨得歸山計。兩頃村田一畝宮。



聞微之江陵臥病以大通中散碧腴垂雲膏寄之因題四韻

已題一帖紅消散。又封一合碧雲英。憑人寄向江陵去。道路迢迢一月程。未必能治江上瘴。且圖遙慰病中情。到時想得君拈得。枕上開看眼暫明。

酬錢員外雪中見寄

松雪無塵小院寒。閉門不似住長安。煩君想我看心坐。報道心空無可看。

重酬錢員外

雪中重寄雪山偈。問答殷勤四句中。本立空名緣破妄。若能無妄亦無空。

獨酌憶微之

獨酌花前醉憶君。與君春別又逢春。惆悵銀杯來處重。不曾盛酒勸閑人。

微之宅殘牡丹

殘紅零落無人賞。雨打風摧花不全。諸處見時猶悵望。况當元九小亭前。

新磨鏡

衰容常晚櫛。秋鏡偶新磨。一與清光對。方知白髮多。鬢毛從幻化。心地付頭陀。任意渾成雪。其如似夢何。

感髮落

昔日愁頭白。誰知未白衰。眼看應落盡。無可變成絲。

八月十五日夜聞崔大員外翰林獨直對酒翫月因懷禁中清景偶題是詩

秋月高懸空碧外。仙郎靜翫禁闌間。歲中惟有今宵好。海內無如此地閑。皓色分明雙闕勝。清光深到九門關。遙聞獨醉還惆悵。不見金波照玉山。

酬王十八見寄

秋思太白峯頭雪。晴憶仙遊洞口雲。未報皇恩歸未得。慚君爲寄北山文。

立春日酬錢員外曲江同行見贈

下直遇春日。垂鞭出禁闌。兩人攜手語。十里看山歸。柳色早黃淺。水文新綠微。風光向晚好。車馬近南稀。機盡笑相顧。不驚鷗鷺飛。

和錢員外青龍寺上方望舊山

舊峯松雪舊溪雲。悵望今朝遙屬君。共道使臣非俗吏。南山莫動北山文。

宴周皓大夫光福宅

何處風光最可憐。妓堂階下砌臺前。軒車擁路光照地。絲管入門聲沸天。綠蕙不香饒桂酒。紅櫻無色讓花鈿。野人不敢求他事。唯借泉聲伴醉眠。

晚秋夜

碧空溶溶月華靜。月裏愁人弔孤影。花開殘菊傍疎籬。葉下衰桐落寒井。塞鴻飛急覺秋盡。鄰雞鳴遲知夜永。凝情不語空所思。風吹白露衣裳冷。

惜牡丹花二首

惆悵階前紅牡丹。晚來唯有兩枝殘。明朝風起應吹盡。夜惜衰紅把火看。寂寞萎紅低向雨。離披破豔散隨風。清明落地猶惆悵。何況飄零泥土中。

答元奉禮同宿見贈

相逢俱歎不閑身。直日常多齋日頻。曉鼓一聲分散去。明朝風景屬何人。

答馬侍御見贈

謬入金門侍玉除。煩君問我意何如。蟠木詎堪明主用。籠禽徒與故人疎。苑花似雪同隨輦。宮月如眉伴直廬。淺薄求賢思自代。嵇康莫寄絕交書。

上巳日恩賜曲江宴會卽事

賜歡仍許醉。此會興如何。翰苑主恩重。曲江春意多。花低羞豔妓。鶯散讓清歌。共道升平樂。元和勝永和。

夜惜禁中桃花因懷錢員外

前日歸時花正紅。今夜宿時枝半空。坐惜殘芳君不見。風吹狼藉月明中。

和錢員外早冬翫禁中新菊

禁署寒氣遲。孟冬菊初拆。新黃間繁綠。爛若金照碧。仙郎小隱日。心似陶彭澤。秋憐潭上看。日慣籬邊摘。今來此地賞。野意潛自適。金馬門內花。玉山峯下客。寒芳引清句。吟翫煙景夕。賜酒色偏宜。握蘭香不敵。淒淒百卉死。歲晚冰霜積。唯有此花開。殷勤助君惜。

答劉戒之早秋別墅見寄

涼風木槿籬。暮雨槐花枝。併起新秋思。爲得故人詩。避地烏擇木。升朝魚在池。城中與山下。喧靜闔相思。

涼夜有懷

念別感時節。早蛩聞一聲。風簾夜涼入。露篔秋意生。燈盡夢初罷。月斜天未明。闌凝無限思。起傍藥欄行。

秋思

病眠夜少夢。閑立秋多思。寂寞餘雨晴。蕭條早寒至。烏栖紅葉樹。月照青苔地。何況鏡中年。又過三十二。

禁中聞蛩

悄悄禁門閉。夜深無月明。西窗獨闔坐。滿耳新蛩聲。

秋蟲

切切闔窗下。嚶嚶深草裏。秋天思婦心。雨夜愁人耳。

贈別宣上人

上人處世界。清淨何所似。似彼白蓮花。在水不著水。性真悟泡幻。行潔離塵滓。修道來幾時。身心俱到此。嗟予牽世網。不得長依止。離念與碧雲。秋來朝夕起。

春夜喜雪有懷王二十二

夜雪有佳趣。幽人出書帷。微寒生枕席。輕素封階墀。坐罷楚絃曲。起吟班扇詩。明宜滅燭後。淨愛褰簾時。窗引曙色早。庭銷春氣遲。山陰應有興。不臥待微之。

酬和元九東川路詩十二首

駱口驛舊題詩

拙詩在壁無人愛。烏汙苔侵文字殘。唯有多情元侍御。繡衣不惜拂塵看。

南秦雪

往歲曾爲西邑吏。慣從駱口到南秦。三時雲冷多飛雪。二月山寒少有春。我思舊事猶惆悵。君作初行定苦辛。仍賴愁猿寒不叫。若聞猿叫更愁人。

山枇杷花二首

萬重青嶂蜀門口。一樹紅花山頂頭。春盡憶家歸未得。低紅如解替君愁。葉如裙色碧綃淺。花似芙蓉紅粉輕。若使此花兼解語。推囚御史定違程。

江樓月

嘉陵江曲曲江遲。明月雖同人別離。一宵光景潛相憶。兩地陰晴遠不知。誰料江邊懷我夜。正當池畔望君時。今朝共語方同悔。不解多情先寄詩。

亞枝花

山郵花木似平陽。愁殺多情驄馬郎。還似昇平池畔坐。低頭向水自看粧。

江上笛

江上何人夜吹笛。聲聲似憶故園春。此時聞者堪頭白。况是多愁少睡人。

嘉陵夜有懷二首

露溼牆花春意深。西廊月上半牀陰。憐君獨臥無言語。惟我知君此夜心。不明不闇隴隴月。非暖非寒慢慢風。獨臥空牀好天氣。平明閑事到心中。

夜深行

白牢關外夜行客。三殿角頭宵直人。莫道近臣勝遠使。其如同是不閑身。

望驛臺

靖安宅裏當窗柳。望驛臺前撲地花。兩處春光同日盡。居人思客客思家。

江岸梨

梨花有思緣和葉。一樹江頭惱殺君。最似嬾閨少年婦。白粧素袖碧紗裙。

答謝家最小偏憐女

嫁得梁鴻六七年。耽書愛酒日高眠。雨荒春圃唯生草。雪壓朝廚未有煙。身病憂來緣女少。家貧忘却爲夫賢。誰知厚俸今無分。枉向秋風吹紙錢。

答騎馬入空臺

君入空臺去。朝往暮還來。我入泉臺去。泉門無復開。鰥夫仍繫職。稚女未勝哀。寂寞咸陽道。家人覆墓迴。

答山驛夢

入君旅夢來千里。閉我幽魂欲二年。莫忘平生行坐處。後堂階下竹叢前。

和元九與呂二同宿話舊感贈

見君新贈呂君詩。憶得同年行樂時。爭入杏園齊馬首。潛過柳曲鬪蛾眉。八人雲散俱遊宦。七度花開盡別離。聞道秋娘猶且在。至今時復問微之。

憶元九

眇眇江陵道。相思遠不知。近來文卷裏。半是憶君詩。

蕭員外寄新蜀茶

蜀茶寄到但驚新。渭水煎來始覺珍。滿甌似乳堪持翫。況是春深酒渴人。

寄上大兄 已後詩在邕林居作

秋鴻過盡無書信。病戴紗巾強出門。獨上荒臺東北望。日西愁立到黃昏。

病中哭金鑾子

豈料吾方病。翻悲汝不全。臥驚從枕上。扶哭就燈前。有女誠爲累。無兒豈免憐。病來纔十日。養得已三年。慈淚隨聲迸。悲腸遇物牽。故衣猶架上。殘藥尙頭邊。送出深村巷。看封小墓田。莫言三里地。此別是終天。

寄內

桑條初綠卽爲別。柿葉半紅猶未歸。不如村婦知時節。解爲田夫秋擣衣。

病氣

自知氣發每因情。情在何由氣得平。若問病根深與淺。此身應與病齊生。

歎元九

不入城門來五載。同時班列盡官高。何人牢落猶依舊。唯有江陵元士曹。

眼睛

早年勤倦看書苦。晚歲悲傷出淚多。眼損不知都自取。病成方悟欲如何。夜昏乍似燈將滅。朝闈長疑鏡未磨。千藥萬方治不得。唯應閉目學頭陀。

得袁相書

穀苗深處一農夫。面黑頭斑手把鋤。何意使人猶識我。就田來送相公書。

病中作

病來城裏諸親故。厚薄親疎心總知。唯有蔚章於我分。深於同在翰林時。

感化寺見元九劉三十二題名處

微之謫去千餘里。大白無來十一年。今日見名如見面。塵埃壁上破窗前。

遊悟真寺迴山下別張殷衡

世緣未了住不得。孤負青山心共知。愁君又入都門去。卽是紅塵滿眼時。

村居寄張殷衡

金氏村中一病夫。生涯蕩落性靈迂。唯看老子五千字。不蹋長安十二衢。藥銚夜傾殘酒煖。竹牀寒取舊氈鋪。聞君欲發江東去。能到茅菴訪別無。

病中得樊大書



荒村破屋經年臥。寂絕無人問病身。唯有東都樊著作。至今書信尙殷勤。  
開元九詩書卷

紅牋白紙兩三束。半是君詩半是書。經年不展緣身病。今日開看生意魚。  
晝臥

抱枕無言語。空房獨悄然。誰知盡日臥。非病亦非眠。

夜坐

庭前盡日立到夜。燈下有時坐徹明。此情不語何人會。時復長吁一兩聲。

暮立

黃昏獨立佛堂前。滿地槐花滿樹蟬。大抵四時心總苦。就中腸斷是秋天。

有感

絕絃與斷絲。猶有却續時。唯有衷腸斷。無應續得期。

答友問

似玉童顏盡。如霜病鬢新。莫驚身頓老。心更老於身。

村夜

霜草蒼蒼蟲切切。村南村北行人絕。獨出前門望野田。月明蕎麥花如雪。

聞蟲

聞蟲唧唧夜繇繇。况是秋陰欲雨天。猶恐愁人暫得睡。聲聲移近臥牀前。  
寒食夜有懷

寒食非長非短夜。春風不熱不寒天。可憐時節堪相憶。何况無燈各早眠。  
贈內

漠漠閭苔新雨地。微微涼露欲秋天。莫對月明思往事。損君顏色減君年。  
得錢舍人書問眼疾

春來眼闔少心情。點盡黃連尙未平。唯得君書勝得藥。開緘未讀眼先明。  
還李十一馬

傳語李君勞寄馬。病來唯拄杖扶身。縱擬強騎無出處。却將牽與趁朝人。  
九日寄行簡

摘得菊花攜得酒。遶村騎馬思悠悠。下邳田地平如掌。何處登高望梓州。  
夜坐

斜月入前楹。迢迢夜坐情。梧桐上階影。蟋蟀近牀聲。曙傍窗間至。秋從簾上生。感時因憶事。不寢到雞鳴。  
村居二首

田園莽蒼經春早。籬落蕭條盡日風。若問經過談笑者。不過田舍白頭翁。  
門閉仍逢雪。廚寒未起煙。貧家重寥落。半爲日高眠。

早春

雪散因和氣。冰開得暖光。春銷不得處。唯有鬢邊霜。

和夢遊春詩一百韻 并序

微之既到江陵。又以夢遊春詩七十韻寄予。且題其序曰。斯言也。不可使不知吾者知。知吾者亦不可使不知。樂天知吾也。吾不敢不使吾子知。子辱斯言。三復其旨。大抵悔既往而悟將來也。然予以爲苟不悔不悟則已。若悔於此。則宜悟於彼也。反於彼而悟於妄。則宜歸於真也。况與足下外服儒風。內宗梵行者。有日矣。而今而後。非覺路之返也。非空門之歸也。將安反乎。將安歸乎。今所和者。其卒章指歸於此。夫感不甚則悔不熟。感不至則悟不深。故廣足下七十韻爲一百韻。重爲足下陳夢遊之中所以甚感者。敘婚仕之際。所以至感者。欲使曲盡其妄。周知其非。然後返乎真。歸乎實。亦猶法華經序火宅偈化城維摩經人姪舍過酒肆之義也。微之微之。予斯文也。尤不可使不知吾者知。幸藏之爾云。

昔君夢遊春。夢遊仙山曲。恍若有所遇。似愜平生欲。因尋菖蒲水。漸入桃花谷。到一紅樓家。愛之看不足。池流渡清泚。草嫩蹋綠蓍。門柳圍全低。簷櫻紅半熟。轉行深深院。過盡重重屋。烏龍臥不驚。青鳥飛相逐。漸聞玉珮響。始辯珠履躅。遙見窗下人。娉婷十五六。霞光抱明月。蓮豔開初旭。縹緲雲雨仙。氛氳蘭麝馥。風流薄梳洗。時世寬裝束。袖輒異文綾。裾輕單絲縠。裙腰銀線壓。梳掌金筐蹙。帶纈紫葡萄。袴花紅石竹。凝情都未語。付意微相矚。眉斂遠山青。鬢低片雲綠。帳牽翡翠帶。被解鴛鴦襪。秀色似堪飡。穠華如可掬。半卷錦頭席。斜鋪繡腰褥。朱脣素指勻。粉汗紅縣撲。心驚睡易覺。夢斷魂難續。籠委獨棲禽。劍分連理木。

存誠期有感。誓志貞無黷。京洛八九春。未曾花裏宿。壯年徒自棄。佳會應無復。鸞歌不重聞。鳳兆從茲卜。  
韋門女清貴。裴氏甥賢淑。羅扇夾花燈。金鞍攢繡轂。旣傾南國貌。遂坦東牀腹。劉阮心漸忘。潘楊意方睦。  
新修履信第。初食尙書祿。九醞備聖賢。八珍窮水陸。秦家重簫史。彥輔憐衛叔。朝饌饋獨盤。夜醪傾百斛。  
親賓盛輝赫。妓樂紛曄煜。宿醉纔解醒。朝歡俄枕麴。飲過君子爭。令甚將軍酷。酩酊歌鷓鴣。顛狂舞鸚鵡。  
月流春夜短。日下秋天速。謝傅隙奔光。簫娘風過燭。全凋薜花折。半死梧桐禿。闔鏡對孤鸞。哀弦留寡鵠。  
淒淒隔幽顯。冉冉移寒燠。萬事此時休。百身何處贖。提攜小兒女。將領舊姻族。再入朱門行。一傍青樓哭。  
櫪空無廐馬。水涸失池鶩。搖落廢井枯。荒涼故籬菊。莓苔上几閣。塵土生琴筑。舞榭綴蠨蛸。歌梁聚蝙蝠。  
嫁分紅粉妾。賣散倉頭僕。門客思徬徨。家人泣咿嘷。心期正蕭索。宦序仍踟躕。懷策入嶠函。驅車辭郊廓。  
逢時念旣濟。聚學思大畜。端評筮仕著。磨拭穿楊鏃。始從讎校職。首中賢良目。一拔侍瑤墀。再升著繡服。  
誓酬君主寵。願使朝廷肅。密勿奏封章。清明操憲牘。鷹隼中病下。豸角當邪觸。糾謬靜東周。申冤勸南蜀。  
危言詆閹寺。直氣忤鈞軸。不忍曲作鉤。乍能折爲玉。捫心無愧畏。騰口有謗讟。只要明是非。何曾虞禍福。  
車摧太行路。劍落鄴城獄。襄漢問脩途。荆蠻指殊俗。謫爲江府掾。遣事荊州牧。趨走謁麾幢。喧煩視鞭朴。  
簿書常自領。繯囚每親鞠。竟日坐官曹。經旬曠休沐。宅荒渚宮草。馬瘦畝田粟。薄俸等涓毫。微官同桎梏。  
月中照形影。天際辭骨肉。鶴病翅羽垂。獸窮爪牙縮。行看鬢間白。誰勸杯中綠。時傷大野麟。命問長沙鵬。  
夏梅山雨漬。秋瘴江雲毒。巴水白茫茫。楚山青簇簇。吟君七十韻。是我心所蓄。旣去誠莫追。將來幸當勸。  
欲除憂惱病。當取禪經讀。須悟事皆空。無令念將屬。請思遊春夢。此夢何閃倏。豔色卽空花。浮生乃燼燬。

良姻在嘉偶。頃刻爲單獨。入仕欲榮身。須臾成黜辱。合者離之始。樂兮憂所伏。愁恨僧祇長。歡榮利那促。覺悟因傍喻。迷執由當局。膏明誘闇蛾。陽焱奔癡鹿。貪爲苦聚落。愛是悲林麓。水蕩無明波。輪迴死生輻。塵應甘露灑。垢待醜齣浴。郵要智燈燒。魔須慧刀戮。外重性易染。內戰心難紐。法句與心王。期君日三復。

王昭君二首

滿面胡沙滿鬢風。眉銷殘黛臉銷紅。愁苦辛勤顛顛盡。如今却似畫圖中。漢使却迴憑寄語。黃金何日贖蛾眉。君王若問妾顏色。莫道不如宮裏時。

卷十五

律詩 五言 七言 自兩韻至一百韻 凡一百首

渭村退居寄禮部崔侍郎翰林錢舍人詩一百韻

聖代元和歲。閑居渭水陽。不才甘命外。多幸遇時康。朝野分倫序。賢愚定否臧。重文疎卜式。尙少棄馮唐。由是推天運。從茲樂性場。籠禽放高翥。霧豹得深藏。世慮休相擾。身謀且自強。猶須務衣食。未免事農桑。薤草通三徑。開田占一坊。晝扉扃白板。夜碓搗黃梁。隙地治場圃。閑時糞土疆。枳籬編刺夾。薤壠擘科秧。穡力嫌身病。農心願歲穰。朝衣典盃酒。佩劍博牛羊。困倚栽松錡。飢提採蕨筐。引泉來後澗。移竹下前岡。生計雖勤苦。家資甚渺茫。塵埃常滿甌。錢帛少盈囊。弟病仍扶杖。妻愁不出房。傳衣念縵縷。舉案笑糟糠。犬吠村皆鬧。蟬鳴織婦忙。納租看縣帖。輸粟問軍倉。夕歇攀村樹。秋行繞野塘。雲容陰慘澹。月色冷悠揚。

蕎麥鋪花白。棠梨間葉黃。早寒風撼撼。新霽月蒼蒼。園菜迎霜死。庭蕪過雨荒。簷空愁宿燕。壁闇思啼螿。  
眼爲看書損。肱因運甃傷。病骸渾似木。老鬢欲成霜。少睡知年長。端憂覺夜長。舊遊多廢妄。往事偶思量。  
忽憶煙霄路。常陪劍履行。登朝思檢束。入閣學趨跄。命偶風雲會。恩覃雨露霽。沾枯發枝葉。磨鈍起鋒鋟。  
崔閣連鑣鷺。錢兄接翼翔。齊竽混韶夏。燕石廁琳琅。同日升金馬。分宵直未央。共詞加寵命。合表謝恩光。  
殿馬驕初跨。天廚味始嘗。朝脯頒餅餌。寒暑賜衣裳。對秉鵝毛筆。俱含雞舌香。青縑衾薄絮。朱裏幕高張。  
晝食恆連案。宵眠每並牀。差肩承詔旨。連署進封章。起草偏同視。疑文最共詳。滅私容點竄。窮理析毫芒。  
便共輸肝膽。何曾異肺腸。慎微參石奮。決密與張湯。禁闔青交瑣。宮垣紫界牆。井欄排菡萏。簷瓦鬪鴛鴦。  
樓額題鳩鵲。池心浴鳳凰。風枝萬年動。溫樹四時芳。宿露凝金掌。晨暉上璧璫。砌筠塗綠粉。庭果滴紅漿。  
曉從朝興慶。春陪宴柏梁。傳呼鞭索索。拜舞珮鏘鏘。仙仗環雙闕。神兵闢兩廂。火翻紅尾旆。冰卓白竿槍。  
濕漑經魚藻。深沉近浴堂。分庭皆命婦。對院卽儲皇。貴主冠浮動。親王轡鬧裝。金鈿相照耀。朱紫間煒煌。  
毬簇桃花騎。歌巡竹葉觴。窪銀中貴帶。昂黛內人粧。賜禊東城下。頒酺曲水傍。樽壘分聖酒。妓樂借仙倡。  
漫酌皆紅藥。徐吟把綠楊。宴迴過御陌。行歇入僧房。白鹿原東郭。青龍寺北廊。望春花景暖。避暑竹風涼。  
下直閑如社。尋芳醉似狂。有時還後到。無處不相將。雞鶴初雖雜。蕭蘭久乃彰。來燕隗貴重。去魯孔恂惶。  
聚散期難定。飛沈勢不常。五年同晝夜。一別似參商。屈折孤生竹。銷摧百鍊剛。途窮任憔悴。道在肯悵惶。  
尙念遺簪折。仍憐病雀瘡。卹寒分賜帛。救餒減餘糧。藥物來盈裹。書題寄滿箱。殷勤翰林主。珍重禮闈郎。  
煦沫誠多謝。搏扶豈所望。提攜勞氣力。吹簸不飛揚。拙劣才何用。龍鍾分自當。粧嫖徒費黛。磨甌詎成璋。

習隱將時背干名與道妨。外身宗老氏齊物學蒙莊。疎放遺千慮。愚蒙守一方。樂天無怨歎。倚命不勸勤。  
憤懣胸須豁。交加臂莫攘。珠沉猶是寶。金躍未爲祥。泥尾休搖掉。灰心罷激昂。漸閑親道友。因病事醫王。  
息亂歸禪定。存神入坐亡。斷癡求慧劍。濟苦得慈航。不動爲吾志。無何是我鄉。可憐身與世。從此兩相忘。

酬盧祕書二十韻

謬歷文場選。慚非翰苑才。雲霄高翥致。毛羽弱先摧。識分忘軒冕。知歸返草萊。杜陵書積蠹。豐獄劍生苔。  
晦厭鳴雞雨。春驚震蟄雷。舊恩收墜履。新律動寒灰。鳳詔容徐起。鷓行許重陪。衰顏雖拂拭。蹇步尙低徊。  
睡少鐘偏警。行遲漏苦催。風霜趁朝去。泥雪拜陵迴。上感君猶念。傍慚友或推。石頑鑄費力。女醜嫁勞媒。  
倏忽青春度。奔波白日頽。性將時共背。病與老俱來。聞有蓬壺客。知懷杞梓材。世家標甲地。官職滯麟臺。  
筆盡鉛黃點。詩成錦繡堆。嘗思豁雲霧。忽喜訪塵埃。心爲論文合。眉因勸善開。不勝珍重意。滿袖寫瓊瑤。

題盧祕書夏日新栽竹二十韻

湘竹初封植。盧生此考槃。久持霜節苦。新託露根難。等度須當砌。疎稠要滿欄。買憐分薄俸。栽稱作閑官。  
葉翦藍羅碎。莖抽玉瑄端。幾聲清浙瀝。一簇綠檀欒。未夜青嵐入。先秋白露團。拂肩搖翡翠。熨手弄琅玕。  
韻透窗風起。陰鋪砌月殘。炎天聞覺冷。窄地見疑寬。梢動勝搖扇。枝低好挂冠。碧籠煙霧縹。珠灑雨珊瑚。  
晚籜晴雲展。陰芽蟄虺蟠。愛從抽馬策。惜未截魚竿。松韻徒煩聽。桃夭不足觀。梁慚當室杏。臺陋本司蘭。  
撐撥詩人興。勾牽酒客歡。靜連蘆葦滑。涼拂葛衣單。豈止消時暑。應能保歲寒。莫同凡草木。一種夏中看。

渭村酬李二十見寄

百里音書何太遲。暮秋把得暮春詩。柳條綠日君相憶。梨葉紅時我始知。莫歎學官貧冷落。猶勝村客病支離。形容意緒遙看取。不似華陽觀裏時。

初授贊善大夫早朝寄李二十助教

病身初謁青宮日。衰貌新垂白髮年。寂寞曹司非熱地。蕭條風雪是寒天。遠坊早起常侵鼓。瘦馬行遲苦費鞭。一種共君官職冷。不如猶得日高眠。

欲與元八卜鄰先有是贈

平生心迹最相親。欲隱牆東不爲身。明月好同三徑夜。綠楊宜作兩家春。每因暫出猶思伴。豈得安居不擇鄰。可獨終身數相見。子孫長作隔牆人。

遊城南留元九李二十晚歸

老遊春飲莫相違。不獨花稀人亦稀。更勸殘杯看日影。猶應趁得鼓聲歸。

廣宣上人以應制詩見示因以贈之詔許上人居安國寺紅樓院以詩供奉

道林談論惠休詩。一到人天便作師。香積筵承紫泥詔。昭陽歌唱碧雲詞。紅樓許住請銀鑰。翠輦陪行賜玉墀。惆悵甘泉曾侍從。與君前後不同時。

重過祕書舊房因題長句

閣前下馬思徘徊。第二房門手自開。昔爲白面書郎去。今作蒼鬚贊善來。吏人不識多新補。松竹相親是舊栽。應有題牆名姓在。試將衫袖拂塵埃。



重到城見元九七絕句

容貌一日減。一日心情十分無。九分。每逢陌路猶嗟歎。何況今朝是見君。

高相宅

青苔故里懷恩地。白髮新生抱病身。涕淚雖多無哭處。永寧門館屬他人。

張十八

諫垣幾見遷遺補。憲府頻聞轉殿監。獨有詠詩張太祝。十年不改舊官銜。

劉家花

劉家牆上花還發。李士門前草又春。處處傷心心始悟。多情不及少情人。

裴五

莫怪相逢無笑語。感今思舊戟門前。張家伯仲偏相似。每見清楊一惘然。

仇家酒

年年老去歡情少。處處春來感事深。時到仇家非愛酒。醉時心勝醒時心。

恆寂師

舊遊分散人零落。如此傷心事幾條。會逐禪師坐禪去。一心滅盡定中消。

靖安北街贈李二十

榆莢拋錢柳展眉。兩人並馬語行遲。還似往年安福寺。共君私試却迴時。

重傷小女子

學人言語憑牀行。嫩似花房脆似瓊。纔知恩愛迎三歲。未辯東西過一生。汝異下殤應殺禮。吾非上聖詎忘情。傷心自歎鳩巢拙。長墮春雛養不成。

過顏處士墓

向墳道徑沒荒榛。滿室詩書積闕塵。厚夜肯教黃壤曉。悲風不許白楊春。簞瓢顏子生仍促。布被黔婁死更貧。未會悠悠上天意。惜將富壽與何人。

題周皓大夫新亭子二十二韻

東道常爲主。南亭別待賓。規模何日創。景致一時新。廣砌羅紅藥。疎窗蔭綠筠。鎖開賓閣曉。梯上妓樓春。置醴寧三爵。加籩過八珍。茶香飄紫筍。膾縷落紅鱗。輝赫車輿鬧。珍奇鳥獸馴。獼猴看櫪馬。鸚鵡喚家人。錦額簾高卷。銀花盞慢巡。勸嘗光祿酒。許看洛川神。斂翠凝歌黛。流香動舞巾。裙翻繡鷓鴣。梳陷鈿麒麟。笛怨音含楚。箏嬌語帶秦。侍兒催畫燭。醉客吐文茵。投轄多連夜。鳴珂便達晨。入朝紆紫綬。待漏擁朱輪。貴介交三事。光榮照四鄰。甘濃將奉客。穩煖不緣身。十載歌鐘地。三朝節鉞臣。愛才心倜儻。敦舊禮殷勤。門以招賢盛。家因好事貧。始知豪傑意。富貴爲交親。

賦得聽邊鴻

驚風吹起塞鴻羣。半拂平沙半入雲。爲問昭君月下聽。何如蘇武雪中聞。

見楊弘貞詩賦因題絕句以自諭

賦句詩章妙入神。未年三十卽無身。常嗟薄命形顛顛。若比弘貞是幸人。

病中早春

今朝枕上覺頭輕。強起塔前試脚行。羶膩斷來無氣力。風痰惱得少心情。暖銷霜瓦津初合。寒減冰渠凍不成。唯有愁人鬢間雪。不隨春盡逐春生。

送人貶信州判官

地僻山深古上饒。土風貧薄道程遙。不唯遷客須恓屑。見說居人也寂寥。溪畔毒砂藏水弩。城頭枯樹下山魍。若於此郡爲卑吏。刺史廳前又折腰。

曲江醉後贈諸親故

郭東丘墓何年客。江畔風光幾日春。只合殷勤逐杯酒。不須疎索向交親。中天或有長生藥。下界應無不死人。除却醉來開口笑。世間何事更關身。

和元八侍御升平新居四絕句

看花屋

忽驚映樹新開屋。却似當簷故種花。可惜年年紅似火。今春始得屬元家。

累土山

堆土漸高山意出。終南移入戶庭間。玉峯藍水應惆悵。恐見新山忘舊山。

高亭

亭脊太高君莫坼。東家留取當西山。好看落日斜銜處。一片春嵐映半環。

松樹

白金換得青松樹。君既先栽我不栽。幸有西風易憑仗。夜深偷送好聲來。

醉後却寄元九

蒲池村裏念念別。澧水橋邊兀兀迴。行到城門殘酒醒。萬重離恨一時來。

重寄

蕭散弓驚雁。分飛劍化龍。悠悠天地內。不死會相逢。

李十一舍人松園飲小酌酒得元八侍御詩序云在臺中推院有鞠獄之苦卽事書懷因酬四韻  
愛酒舍人開小酌。能文御史寄新詩。亂松園裏醉相憶。古柏廳前忙不知。早夏我當逃暑日。晚衙君是慮  
囚時。惟應清夜無公事。新草亭中好一期。

重到華陽觀舊居

憶昔初年三十二。當時秋思已難堪。若爲重入華陽院。病鬢愁心四十三。

答勸酒

莫怪近來都不飲。幾迴因醉却沾巾。誰料平生狂酒客。如今變作酒悲人。

題王侍御池亭

朱門深鎖春池滿。岸落薔薇水浸莎。畢竟林塘誰是主。主人來少客來多。

聽水部吳員外新詩因贈絕句

朱紱仙郎白雪歌。和人雖少愛人多。明朝與向詩家道。水部如今不姓何。

雨夜憶元九

天陰一日便堪愁。何況連宵雨不休。一種雨中君最苦。偏梁閣道向通州。

雨中攜元九詩訪元八侍御

微之詩卷憶同開。假日多應不入臺。好句無人堪共詠。衝泥蹋水就君來。

贈楊祕書巨源

早聞一箭取遼城。相識雖新有故情。清句三朝誰是敵。白鬚四海半爲兄。貧家薤草時時入。瘦馬尋花處處行。不用更教詩過好。折君官職是聲名。

和武相公感韋令公舊池孔雀

索寞少顏色。池邊無主禽。難收帶泥翅。易結着人心。頂毳落殘碧。尾花銷闌金。放歸飛不得。雲海故巢深。

寄生衣與微之因題封上

淺色縠衫輕似霧。紡花紗袴薄於雲。莫嫌輕薄但知著。猶恐通州熟殺君。

白牡丹

白花冷澹無人愛。亦占芳名道牡丹。應似東宮白贊善。被人還喚作朝官。

夢舊

別來老大苦修道。鍊得離心成死灰。平生憶念消磨盡。昨夜因何入夢來。

戲題盧祕書新移薔薇

風動翠條腰。嫋娜露垂紅。萼淚闌干。移他到此。須爲主。不別花人莫使看。

曲江夜歸聞元八見訪

自入臺來見面稀。班中遙得揖容輝。早知相憶來相訪。悔待江頭明月歸。

苦熱題恆寂師禪室

人人避暑走如狂。獨有禪師不出房。可是禪房無熱到。但能心靜卽身涼。

微之到通州日。授館未安。見塵壁間有數行字。讀之卽僕舊詩。其落句云。淥水紅蓮一朵開。千花百草無顏色。然不知題者何人也。微之吟歎不足。因綴一章。兼錄僕詩本同寄。其詩乃是十五年前初及第時。贈長安妓人阿軟絕句。緬思往事。杳若夢中。懷舊感今。因酬長句。

十五年前似夢遊。曾將詩句結風流。偶助笑歌嘲阿軟。可知傳誦到通州。昔教紅袖佳人唱。今遣青衫司馬愁。惆悵又聞題處所。雨淋江館破牆頭。

得微之到官後書。備知通州之事。悵然有感。因成四章。

來書子細說通州。州在山根峽岸頭。四面千重火雲合。中心一道瘴江流。蟲蛇白晝攔官道。蚊蟆黃昏撲郡樓。何罪遣君居此地。天高無處問來由。

匡廬巔山萬仞餘。人家應似甑中居。寅年籬下多逢虎。亥日沙頭始賣魚。衣斑梅雨長須熨。米澀畬田不

解組努力安心過三考。已曾愁殺李尚書。  
人稀地僻醫巫少。夏旱秋霖瘴瘧多。老去一身須愛惜。別來四體得如何。侏儒飽笑東方朔。蕙苴讒憂馬  
伏波。莫遣沉愁結成病。時時一唱濯纓歌。  
通州海內恓惶地。司馬人間冗長官。傷鳥有弦驚不定。臥龍無水動應難。劍埋獄底誰深掘。松偃霜中盡  
冷看。舉目爭能不惆悵。高車大馬滿長安。

病中答招飲者

顧我鏡中悲白髮。盡君花下醉青春。不緣眼痛兼身病。可是樽前第二人。

燕子樓三首 并序

徐州故張尚書有愛妓曰盼盼。善歌舞。雅多風態。予爲校書郎時。遊徐泗間。張尚書宴予。酒酣。出盼盼以  
佐歡。歡甚。予因贈詩云。醉嬌勝不得。風嫋牡丹花。盡歡而去。邇後絕不相聞。迨茲僅一紀矣。昨日司勳員  
外郎張仲素續之訪予。因吟新詩。有燕子樓三首。詞甚婉麗。詰其由。爲盼盼作也。續之從事武寧軍累年。  
頗知盼盼始末。云尚書旣歿。歸葬東洛。而彭城有張氏舊第。第中有小樓名燕子。盼盼念舊愛而不嫁。居  
是樓十餘年。幽獨塊然。于今尚在。予愛續之新詩。感彭城舊遊。因同其題。作三絕句。  
滿窗明月滿簾霜。被冷燈殘拂臥牀。燕子樓中霜月夜。秋來只爲一人長。  
鈿暈羅衫色似烟。幾迴欲着卽潸然。自從不舞霓裳曲。疊在空箱十一年。  
今春有客洛陽迴。曾到尚書墓上來。見說白楊堪作柱。爭教紅粉不成灰。

初貶官過望秦嶺 自此後詩江州路上作

草草辭家憂後事。遲遲去國問前途。望秦嶺上迴頭立。無限秋風吹白鬚。

藍橋驛見元九詩

藍橋春雪君歸日。秦嶺秋風我去時。每到驛亭先下馬。循牆遶柱覓君詩。

韓公堆寄元九

韓公堆北澗西頭。冷雨涼風拂面秋。努力南行少惆悵。江州猶似勝通州。

發商州

商州館裏停三日。待得妻孥相逐行。若比李三猶自勝。兒啼婦哭不聞聲。

武關南見元九題山石榴花見寄

往來同路不同時。前後相思兩不知。行過關門三四里。榴花不見見君詩。

紅鸚鵡

安南遠進紅鸚鵡。色似桃花語似人。文章辯慧皆如此。籠檻何年出得身。

題四皓廟

臥逃秦亂起安劉。舒卷如雲得自由。若有精靈應笑我。不成一事謫江州。

罷藥

自學坐禪休服藥。從他時復病沈沈。此身不要全強健。強健多生人我心。



白鷺

人生四十未全衰。我爲愁多白髮垂。何故水邊雙白鷺。無愁頭上亦垂絲。

襄陽舟中

下馬襄陽郭。移舟漢陰驛。秋風截江起。寒浪連天白。本是多愁人。復此風波夕。

江夜舟行

烟澹月濛濛。舟行夜色中。江鋪滿槽水。帆展半橋風。叫曙嗷嗷雁。啼秋唧唧蟲。只應催北客。早作白鬚翁。

紅藤杖

交親過澹別。車馬到江迴。唯有紅藤杖。相隨萬里來。

江上吟元八絕句

大江深處月明時。一夜吟君小律詩。應有水仙潛出聽。纔將唱作步虛詞。

途中感秋

節物行搖落。年顏坐變衰。樹初黃葉日。人欲白頭時。鄉國程程遠。親明處處辭。惟憐病與老。一步不相離。

登鄆州白雪樓

白雪樓中一望鄉。青山簇簇水茫茫。朝來渡口逢京使。說道煙塵近洛陽。

舟夜贈內

三聲猿後垂鄉淚。一葉舟中載病身。莫凭水窗南北望。月明月闌總愁人。

逢舊

我梳白髮添新恨。君掃青蛾減舊容。應被傍人怪惆悵。少年離別老相逢。

白口阻風十日

洪濤白浪塞江津。處處遭迴事事屯。世上方爲失途客。江頭又作阻風人。魚蝦遇雨腥盈鼻。蚊蚋和煙癢滿身。老大光陰能幾日。等閒白口坐經旬。

浦中夜泊

閨上江隄還獨立。水風霜氣夜稜稜。迴看深浦停舟處。蘆荻花中一點燈。

盧侍御與崔評事爲予於黃鶴樓致宴宴罷同望

江邊黃鶴古時樓。勞致華筵待我遊。楚思森茫雲水冷。商聲清脆管絃秋。白花浪濺頭陀寺。紅葉林籠鸚鵡洲。總是平生未行處。醉來堪賞醒堪愁。

舟中讀元九詩

把君詩卷燈前讀。詩盡燈殘天未明。眼痛滅燈猶闌坐。逆風吹浪打船聲。

舟行阻風寄李十一舍人

扁舟厭泊烟波上。輕策閑尋浦嶼間。虎踞青泥稠似印。風吹白浪大於山。且愁江郡何時到。敢望京都幾歲還。今日料君朝退後。迎寒新耐煖開顏。

雨中題衰柳

溼屈青條折。寒飄黃葉多。不知秋雨意。更遣欲如何。

題王處士郊居

半依雲渚半依山。愛此令人不欲還。負郭田園八九頃。向陽茅屋兩三間。寒松縱老風標在。野鶴雖飢飲啄閑。一臥江村來早晚。著書盈帙鬢毛斑。

歲晚旅望

朝來暮去星霜換。陰慘陽舒氣序牽。萬物秋霜能壞色。四時冬日最凋年。烟波半露新沙地。鳥雀羣飛欲雪天。向晚蒼蒼南北望。窮陰旅思兩無邊。

晏坐閑吟

昔爲京洛聲華客。今作江湖潦倒翁。意氣銷磨羣動裏。形骸變化百年中。霜侵殘鬢無多黑。酒伴衰顏只鬢紅。賴學禪門非想定。千愁萬念一時空。

題李山人

廚無烟火室無妻。籬落蕭條屋舍低。每日將何療飢渴。井華雲粉一刀圭。

讀莊子

去國辭家謫異方。中心自怪少憂傷。爲尋莊子知歸處。認得無何是本鄉。

江樓偶宴贈同座

南浦閑行罷。西樓小宴時。望湖凭檻久。待月放杯遲。江果嘗盧橘。山歌聽竹枝。相逢且同樂。何必舊新知。

放言五首 并序

元九在江陵時。有放言長句詩五首。韻高而體健。意古而詞新。予每詠之。甚覺有味。雖前輩深於詩者。未有此作。惟李頎有云。濟水至清河自濁。周公大聖接輿狂。斯句近之矣。予出佐潯陽。未屆所任。舟中多暇。江上獨吟。因綴五篇。以續其意耳。

朝真暮僞何人辨。古往今來底事無。但愛臧生能詐聖。可知寧子解佯愚。草螢有耀終非火。荷露雖圓豈是珠。不取燔柴兼照乘。可憐光彩亦何殊。

世途倚伏都無定。塵網牽纏卒未休。禍福迴還車轉轂。榮枯反覆手藏鉤。龜靈未免刳腸患。馬失應無折足憂。不信君看弈棋者。輸贏須待局終頭。

贈君一法決狐疑。不用鑽龜與祝蓍。試玉要燒三日滿。辨材須待七年期。周公恐懼流言日。王莽謙恭未篡時。向使當初身便死。一生真僞復誰知。

誰家第宅成還破。何處親賓哭復歌。昨日屋頭堪炙手。今朝門外好張羅。北邙未省留閑地。東海何曾有定波。莫笑賤貧誇富貴。共成枯骨兩如何。

泰山不要欺毫末。顏子無心羨老彭。松樹千年終是朽。檣花一日自爲榮。何須戀世常憂死。亦莫嫌身漫厭生。生去死來都是幻。幻人哀樂繫何情。

歲暮道情二首

壯日苦曾驚歲月。長年都不惜光陰。爲學空門平等法。先齊老少死生心。

半故青衫半白頭。雪風吹面上江樓。禪功自見無人覺。合是愁時亦不愁。

讀李杜詩集因題卷後

翰林江左日。員外劍南時。不得高官職。仍逢苦亂離。暮年逋客恨。浮世謫仙悲。吟詠流千古。聲名動四夷。文場供秀句。樂府待新辭。天意君須會。人間要好詩。

強酒

若不坐禪銷妄想。卽須行醉放狂歌。不然秋月春風夜。爭那閑思往事何。

獨樹浦雨夜寄李六郎中

忽憶兩家同里巷。何曾一處不追隨。閑遊預算分朝日。靜話多同待漏時。花下放狂衝黑飲。燈前起坐徹明棋。可知風雨孤舟夜。蘆葦叢中作此詩。

聽崔七妓人箏

花臉雲鬟坐玉樓。十三絃裏一時愁。憑君向道休彈去。白盡江州司馬頭。

望江州

江迴望見雙華表。知是潯陽西郭門。猶去孤舟三四里。水烟沙雨欲黃昏。

初到江州

潯陽欲到思無窮。庾亮樓南溢口東。樹木凋疎山雨後。人家低溼水烟中。菰蔣餒馬行無力。蘆荻編房臥有風。遙見朱輪來出郭。相迎勞動使君公。

醉後題李馬二妓

行搖雲髻花鈿節。應似霓裳趁管絃。豔動舞裙渾是火。愁凝歌黛欲生煙。有風縱道能迴雪。無水何由忽吐蓮。疑是兩般心未決。雨中神女月中仙。

盧侍御小妓乞詩座上留贈

鬱金香汗裏。歌巾山石榴花染舞裙。好似文君還對酒。勝於神女不歸雲。夢中那及覺時見。宋玉荆王應羨君。

卷十六

律詩 五言 七言 自兩韻至一百韻 凡一百首

東南行一百韻寄通州元九侍御澧州李十一舍人果州崔二十二使君開州章大員外庾三十  
二補闕杜十四拾遺李二十助教員外竇七校書

南去經三楚。東來過五湖。山頭看候館。水面問征途。地遠窮江界。天低極海隅。飄零同落葉。浩蕩似乘桴。漸覺鄉原異。深知土產殊。夷音語嘲嚙。蠻態笑睢盱。水市通閩閩。烟村混舳舻。吏徵魚戶稅。人納火田租。亥日饒蝦蟹。寅年足虎羆。成人男作吏。事鬼女爲巫。樓閣攢倡婦。隄喧簇販夫。夜船論鋪賃。春酒斷甌沽。見果多盧橘。聞禽悉鷓鴣。山歌猿獨叫。野哭鳥相呼。嶺微雲成棧。江郊水當郭。月橋翹柱鶴。風帆颭檣烏。鼉礙潮無信。蛟驚浪不虞。鼉鳴泉窟室。蜃結氣浮圖。樹裂山魃穴。沙含水弩樞。喘牛犁紫芋。羸馬放青孤。

繡面誰家婢。鴉頭幾歲奴。泥中採菱芡。燒後拾樵蘇。鼎膩愁烹鼈。盤腥厭膾鱸。鍾儀徒戀楚。張翰浪思吳。  
氣序涼還熱。光陰旦復晡。身方逐萍梗。年欲近桑榆。渭北田園廢。江西歲月徂。憶歸恆慘澹。懷舊忽踟蹰。  
自念咸秦客。嘗爲鄒魯儒。蘊藏經國術。輕棄度關繻。賦力凌鸚鵡。詞鋒敵轆轤。戰文重掉鞅。射策一彎弧。  
崔杜鞭齊下。元韋轡並驅。名聲逼楊馬。交分過蕭朱。世務經磨揣。周行竊覬覦。風雲皆會合。雨露各霑濡。  
共偶昇平代。偏慚固陋軀。承明連夜直。建禮拂晨趨。美服頒王府。珍羞降御廚。議高通白虎。諫切伏青蒲。  
柏殿行陪宴。花樓走看酺。神旗張鳥獸。天籟動笙竽。九劍星芒耀。魚龍電策驅。定場排漢旅。促座進吳歙。  
縹緲疑仙樂。嬋娟勝畫圖。歌饗低翠羽。舞汗墮紅珠。別選閑遊伴。潛招劇飲徒。一盃愁已破。三盞氣彌麤。  
軟美仇家酒。幽閑葛氏姝。十千方得斗。二八正當壚。論笑杓胡律。談憐鞏囁噓。李酣尤短寶。庾醉更蕭迂。  
鞍馬呼教住。骰盤喝遣輸。長驅波卷白。連擲采成盧。籌併頻逃席。觥嚴別置盂。滿卮那可灌。頽玉不勝扶。  
入視中樞草。歸乘內廐駒。醉曾衝宰相。驕不揖金吾。日近恩雖重。雲高勢却孤。翻身落霄漢。失脚到泥塗。  
博望移門籍。潯陽佐郡符。時情變寒暑。世利算錙銖。卽日辭雙闕。明朝別九衢。播遷分郡國。次第出京都。  
秦嶺馳三驛。商山上二邛。峴陽亭寂寞。夏口路崎嶇。大道全生棘。中丁盡執殳。江關未徹警。淮寇尙稽誅。  
林對東西寺。山分大小姑。廬峯蓮刻削。湓浦帶縈紆。九派吞青草。孤城覆綠蕪。黃昏鐘寂寂。清曉角嗚嗚。  
春色辭門柳。秋聲到井梧。殘芳悲鷓鴣。暮節感茱萸。藥坼金英菊。花飄雪片蘆。波紅日斜沒。沙白月平鋪。  
幾見林抽筍。頻驚鷺引鵠。歲華何倏忽。年少不須臾。眇默思千古。蒼茫想八區。孔窮緣底事。顏夭有何辜。  
龍智猶經醜。龜靈未免刳。窮通應已定。聖哲不能逾。况我身謀拙。逢他厄運拘。漂流隨大海。鏈鍛任洪爐。

險阻嘗之矣。栖遲命也夫。沈冥消意氣。窮餓耗肌膚。防瘴和殘藥。迎寒補舊襦。書牀鳴蟋蟀。琴匣網蜘蛛。貧室如懸磬。端憂劇守株。時遭人指點。數被鬼揶揄。兀兀都疑夢。昏昏半似愚。女驚朝不起。妻怪夜長吁。萬里拋朋侶。三年隔友于。自然悲聚散。不是恨榮枯。去夏微之瘡。今春席八殂。天涯書達否。泉下哭知無。謾寫詩盈卷。空盛酒滿壺。只添新惆望。豈復舊歡娛。壯志因愁減。衰容與病俱。相逢應不識。滿頰白髭鬚。

謫居

面瘦頭斑四十四。遠謫江州爲郡吏。逢時棄置從不才。未老衰羸爲何事。火燒寒澗松爲燼。霜降春林花委地。遭時榮悴一時間。豈是昭昭上天意。

初到江州寄翰林張李杜三學士

早攀霄漢上天衢。晚落風波委世途。雨露施恩無厚薄。蓬蒿隨分有榮枯。傷禽側翅驚弓箭。老婦低顏事舅姑。碧落三仙曾識面。年深記得姓名無。

庾樓曉望

獨憑朱檻立凌晨。山色初明水色新。竹霧曉籠銜嶺月。蘋風暖送過江春。子城陰處猶殘雪。衙鼓聲前未有塵。三百年來庾樓上。會經多少望鄉人。

宿西林寺

木落天晴山翠開。愛山騎馬入山來。心知不及柴桑令。一宿西林便却迴。

江樓宴別



樓中別曲催離酌。燈下紅裙間綠袍。縹緲楚風羅綺薄。鈿縱越調管絃高。寒流帶月澄如鏡。夕吹和霜利似刀。樽酒未空歡未盡。舞腰歌袖莫辭勞。

題山石榴花

一叢千朵壓欄干。翦碎紅綃却作團。風嫋舞腰香不盡。露銷妝臉淚新乾。薔薇帶刺攀應懶。茵蔯生泥翫亦難。爭及此花簷戶下。任人採弄盡人看。

代春贈

山吐晴嵐水放光。辛夷花白柳梢黃。但知莫作江西意。風景何曾異帝鄉。

答春

草煙低重水花明。從道風光似帝京。其奈山猿江上叫。故鄉無此斷腸聲。

花下歎白髮

逐處花皆好。隨年貌自衰。紅櫻滿眼日。白髮半頭時。倚樹無言久。攀條欲放遲。臨風兩堪歎。如雪復如絲。

惜落花贈崔二十四

漠漠紛紛不奈何。狂風急雨兩相和。晚來悵望君知否。枝上稀疎地上多。

移山櫻桃

亦知官舍非吾宅。且斷山櫻滿院栽。上佐近來多五考。少應四度見花開。

官舍閑題

職散優閑地。身慵老大時。送春唯有酒。銷日不過棋。祿米鹽牙稻。園蔬鴨脚葵。飽飧仍晏起。餘暇弄龜兒。

晚春登大雲寺南樓贈常禪師

花盡頭新白。登樓意若何。歲時春日少。世界苦人多。愁醉非因酒。悲吟不是歌。求師治此病。唯勸讀楞伽。

北樓送客歸上都

憑高送遠一悽悽。却下朱欄卽解攜。京路人歸天直北。江樓客散日平西。長津欲度迴船尾。殘酒重傾簇馬蹄。不獨別君須強飲。窮愁自要醉如泥。

北亭招客

疎散郡丞同野客。幽閑官舍抵山家。春風北戶千莖竹。晚日東園一樹花。小盞吹醅嘗冷酒。深爐敲火炙新茶。能來盡日宮基否。太守知慵放晚衙。

宿西林寺早赴東林滿上人之會因寄崔二十二員外

謫辭魏闕鷓鴣隔。老入廬山麋鹿隨。薄暮蕭條投寺宿。凌晨清淨與僧期。雙林我起聞鐘後。隻日君趨入關時。鷓鴣高低分皆定。莫勞心力遠相思。

遊寶稱寺

竹寺初晴日。花塘欲曉春。野猿疑弄客。山鳥似呼人。酒嫩傾金液。茶新碾玉塵。可憐幽靜地。堪寄老慵身。

早春聞提壺鳥因題鄰家

厭聽秋猿催下淚。喜聞春鳥勸提壺。誰家紅樹先花發。何處青樓有酒沽。進士龐豪尋靜盞。拾遺風彩近

都無欲期。明日東鄰醉。變作騰騰一俗夫。

見紫薇花憶微之

一叢暗淡將何比。淺碧籠裙襯紫巾。除却微之見應愛。人間少有別花人。

薔薇花一叢獨死不知其故因有是篇

柯條未嘗損。根蘗不曾移。同類今齊茂。孤芳忽獨萎。仍憐委地日。正是帶花時。碎碧初凋葉。燦紅尙戀枝。乾坤無厚薄。草木自榮衰。欲問因何事。春風亦不知。

湖亭望水

久雨南湖漲。新晴北客過。日沈紅有影。風定綠無波。岸沒閭閻少。灘平船舫多。可憐心賞處。其奈獨遊何。

閑遊

外事因慵廢。中懷與靜期。尋泉上山遠。看筍出林遲。白石磨樵斧。青竿理釣絲。澄清深淺好。最愛夕陽時。

憶微之傷仲遠李三仲遠去年春喪

幽獨辭羣久。漂流去國賒。只將琴作伴。唯以酒爲家。感逝因看水。傷離爲見花。李三埋地底。元九謫天涯。舉眼青雲遠。迴頭白日斜。可能勝賈誼。猶自滯長沙。

過鄭處士

聞道移居村塢間。竹林多處獨開關。故來不是求他事。暫借南亭一望山。

霖雨苦多江湖暴漲塊然獨望因題北亭

自作潯陽客。無如苦雨何。陰昏晴日少。閑悶睡時多。湖闊將天合。雲低與水和。籬根舟子語。巷口釣人歌。霧鳥沉黃氣。風帆蹴白波。門前車馬道。一宿變江河。

春末夏初閑遊江郭二首

閑出乘輕屐。徐行蹋軟沙。觀魚傍湓浦。看竹入楊家。林迸穿籬筍。藤飄落水花。雨埋釣舟小。風颺酒旗斜。嫩剝青菱角。濃煎白茗芽。淹留不知夕。城樹欲栖鴉。柳影繁初合。鶯聲澀漸稀。早梅迎夏結。殘絮送春飛。西日韶光盡。南風暑氣微。展張新小簾。熨帖舊生衣。綠蟻杯香嫩。紅絲鱸縷肥。故園無此味。何必苦思歸。

紅藤杖 杖出南蠻

南詔紅藤杖。西江白首人。時時攜步月。處處把尋春。勁健孤莖直。疎圓六節勻。火山生處遠。瀘水洗來新。麤細纔盈手。高低僅過身。天邊望鄉客。何日枉歸秦。

風雨中尋李十一因題船上

匹馬來郊外。扁舟在水濱。可憐衝雨客。來訪阻風人。小棹沾清醕。行廚煮白鱗。停杯看柳色。各憶故園春。

題廬山山下湯泉

一眼湯泉流向東。浸泥澆草煖無功。驪山溫水因何事。流入金鋪玉甃中。

寄蘄州簾與元九因題六韻 時元九鰥居

笛竹出蘄春。霜刀劈翠筠。織成雙鎖篔。寄與獨眠人。卷作筒中信。舒爲席上珍。滑如鋪薤葉。冷似臥龍鱗。

清潤宜乘露。鮮華不受塵。通州炎瘴地。此物最關身。

秋熱

西江風候接南威。暑氣常多秋氣微。猶道江州最涼冷。至今九月著生衣。

題元八谿居

溪嵐漠漠樹重重。水檻山窗次第逢。晚葉尙開紅躑躅。秋房初結白芙蓉。聲來枕上千年鶴。影落杯中五老峯。更媿殷勤留客意。魚鮮飯細酒香濃。

晚出西郊

散吏閑如客。貧州冷似村。早涼湖北岸。殘照郭西門。嬾鑷從鬢白。休治任眼昏。老來何所用。少與不多言。

階下蓮

葉展影翻當砌月。花開香散入簾風。不如種在天池上。猶勝生於野水中。

端居詠懷

賈生俟罪心相似。張翰思歸事不如。斜日早知驚鷓鴣。秋風悔不憶鱸魚。胸襟曾貯匡時策。懷袖猶殘諫獵書。從此萬緣都擺落。欲攜妻子買山居。

夜宿江浦聞元八改官因寄此什

君遊丹陛已三遷。我汎滄浪欲二年。劍珮曉趨雙鳳闕。煙波夜宿一漁船。交親盡在青雲上。鄉國遙拋白日邊。若報生涯應笑殺。結茅栽芋種畬田。

百花亭

朱檻在空虛。涼風八月初。山形如峴首。江色似桐廬。佛寺乘船入。人家枕水居。高亭仍有月。今夜宿何如。

江樓早秋

南國雖多熱。秋來亦不遲。湖光朝霽後。竹氣晚涼時。樓閣宜佳客。江山入好詩。清風水蘋葉。白露木蘭枝。欲作雲泉計。須營伏臘資。匡廬一步地。官滿更何之。

送客之湖南

年年漸見南方物。事事堪傷北客情。山鬼趨跳唯一足。峽猿哀怨過三聲。帆開青草湖中去。衣溼黃梅雨裏行。別後雙魚難定寄。近來潮不到湓城。

百花亭晚望夜歸

百花亭上晚徘徊。雲影陰晴掩復開。日色悠揚映山盡。雨聲蕭颯渡江來。鬢毛遇病雙如雪。心緒逢秋一似灰。向夜欲歸愁未了。滿湖明月小船迴。

西樓

小郡大江邊。危樓夕照前。青蕪卑溼地。白露泫寥天。鄉國此時阻。家書何處傳。仍聞陳蔡戍。轉戰已三年。尋李道士山居兼呈元明府

盡日行還歇。遲遲獨上山。攀藤老筋力。照水病容顏。陶巷招居住。茅家許往還。飽諳榮辱事。無意戀人間。

行年四十五。兩鬢半蒼蒼。清瘦詩成癖。麤豪酒放狂。老來尤委命。安處卽爲鄉。或擬廬山下。來春結草堂。

寄李相公崔侍郎錢舍人

曾陪鶴馭兩三仙。親侍龍輿四五年。天上歡華春有限。世間漂泊海無邊。榮枯事過都成夢。憂喜心忘便是禪。官滿更歸何處去。香爐峯在宅門前。

廳前桂

天台嶺上凌霜樹。司馬廳前委地叢。一種不生明月裏。山中猶校勝塵中。

尋王道士藥堂因有題贈

行行見路綠松嶠。步步尋花到杏壇。白石先生小有洞。黃牙姪女大還丹。常悲東郭千家塚。欲乞西山五色丸。但恐長生須有籍。仙臺試爲檢名看。

秋晚

離菊花稀砌桐落。樹陰離離日色薄。單幕疎簾貧寂寞。涼風冷露秋蕭索。光陰流轉忽已晚。顏色凋殘不如昨。萊妻臥病月明時。不擣寒衣空擣藥。

南浦歲暮對酒送王十五歸京

臘後冰生覆湓水。夜來雲闇失廬山。風飄細雪落如米。索索蕭蕭蘆葦間。此地二年留我住。今朝一酌送君還。相看漸老無過醉。聚散窮通總是閑。

除夜

薄晚支頤坐。中宵枕臂眠。一從身去國。再見日周天。老度江南歲。春拋渭北田。潯陽來早晚。明日是三年。

聞李十一出牧澧州崔二十二出牧果州因寄絕句

平生相見卽眉開。靜念無如李與崔。各是天涯爲刺史。緣何不覓九江來。

元和十三年淮寇未平詔停歲仗憤然有感率爾成章

聞停歲仗軫皇情。應爲淮西寇未平。不分氣從歌裏發。無明心向酒中生。愚計忽思飛短檄。狂心便欲請長纓。從來妄動多如此。自笑何曾得事成。

庾樓新歲

歲時銷旅貌。風景觸鄉愁。牢落江湖意。新年上庾樓。

上香爐峯

倚石攀蘿歇病身。青筠竹杖白紗巾。他時畫出廬山鄣。便是香鑪峯上人。

憶微之

與君何日出屯蒙。魚戀江湖鳥厭籠。分手各拋蒼海畔。折腰俱老綠衫中。三年隔闊音塵斷。兩地飄零氣味同。又被新年勸相憶。柳條黃軟欲春風。

雨夜贈元十八

卑溼沙頭宅。連陰雨夜天。共聽簷溜滴。心事兩悠然。把酒循環飲。移牀曲尺眠。莫言非故舊。相識已三年。

寒食江畔



草香沙暖水雲晴。風景令人憶帝京。還似往年春氣味。不宜今日病心情。聞鶯樹下沈吟立。信馬江頭取次行。忽見紫桐花悵望。下邳明日是清明。

三月三日登庾樓寄庾三十二

三日歡遊辭曲水。二年愁臥在長沙。每登高處長相憶。何況茲樓屬庾家。

聞李六景儉自河東令授唐鄧行軍司馬以詩賀之

誰能淮上靜風波。聞道河東應此科。不獨文詞供奉記。定將談笑解兵戈。泥埋劍戟終難久。水借蛟龍可在多。四十著緋軍司馬。男兒官職未蹉跎。

石楠樹

可憐顏色好陰涼。葉翦紅牋花撲霜。傘蓋低垂金翡翠。薰籠亂搭繡衣裳。春芽細炷千燈焰。夏藥濃焚百和香。見說上林無此樹。只教桃柳占年芳。

大林寺桃花

人間四月芳菲盡。山寺桃花始盛開。長恨春歸無覓處。不知轉入此中來。

詠懷

自從委順任浮沈。漸學年多功用深。面上滅除憂喜色。胸中消盡是非心。妻兒不問唯耽酒。冠帶皆慵只抱琴。長笑靈均不知命。江籬叢畔苦悲吟。

早發楚城驛

過雨塵埃滅。沿江道徑平。月乘殘夜出。人趁早涼行。寂歷閑吟動。冥濛闇思生。荷塘翻露氣。稻壠瀉泉聲。宿犬聞鈴起。栖禽見火驚。囓囓煙樹色。十里始天明。

箸峴東池

箸峴亭東有小池。早荷新荇綠參差。中宵把火行人發。驚起雙棲白鷺鷥。

建昌江

建昌江水縣門前。立馬教人喚渡船。忽似往年歸蔡渡。草風沙雨渭河邊。

哭從弟

傷心一尉便終身。叔母年高新婦貧。一片綠衫消不得。腰金拖紫是何人。

香鑪峯下新卜山居草堂初成偶題東壁五首

五架三間新草堂。石塔桂柱竹編牆。南簷納日冬天暖。北戶迎風夏月涼。灑砌飛泉纔有點。拂窗斜竹不成行。來春更葺東廂屋。紙閣蘆簾着孟光。

重題

喜入山林初息影。厭趨朝市久勞生。早年薄有煙霞志。歲晚深諳世俗情。已許虎溪雲裏臥。不爭龍尾道前行。從茲耳界應清淨。免見嘍啾毀譽聲。長松樹下小谿頭。斑鹿胎巾白布裘。藥圃茶園爲產業。野麋林鶴是交遊。雲生澗戶衣裳潤。嵐隱山廚火燭幽。最愛一泉新引得。清冷屈曲遠階流。

日高睡足猶慵起。小閣重衾不怕寒。遺愛寺鐘欹枕聽。香鑪峯雪撥簾看。匡廬便是逃名地。司馬仍爲送老官。心泰身寧是歸處。故鄉可獨在長安。  
宦途自此心長別。世事從今口不言。豈止形骸同土木。兼將壽夭任乾坤。胸中壯氣猶須遣。身外浮榮何足論。還有一條遺恨事。高家門館未酬恩。

山中問月

爲問長安月。誰教不相離。昔隨飛蓋處。今照入山時。借助秋懷曠。留連夜臥遲。如歸舊鄉國。似對好親知。  
松下行爲伴。谿頭坐有期。千巖將萬壑。無處不相隨。

正月十五日夜東林寺學禪偶懷藍田楊主簿因呈智禪師

新年三五東林夕。星漢迢迢鐘梵遲。花縣當君行樂夜。松房是我坐禪時。忽看月滿還相憶。始歎春來自不知。不覺定中微念起。明朝更問鴈門師。

臨水坐

昔爲東掖垣中客。今作西方社內人。手把楊枝臨水坐。閑思往事似前身。

山居

山齋方獨往。塵事莫相仍。藍輿辭鞍馬。緇徒換友朋。朝飧唯藥菜。夜伴只紗燈。除却青衫在。其餘便是僧。

遺愛寺

弄石臨谿坐。尋花遶寺行。時時聞鳥語。處處是泉聲。

山中與元九書因題書後

憶昔封書與君夜。金鑾殿後欲明天。今夜封書在何處。廬山菴裏曉燈前。籠鳥檻猿俱未死。人間相見是何年。

黃石巖下作

久別鸞鸞侶。深隨鳥獸羣。教他遠親故。何處覓知聞。昔日青雲意。今移向白雲。

戲贈李十三判官

垂鞭相送醉醺醺。遙見廬山指似君。想君初覺從軍樂。未愛香鑪峯上人。

醉中戲贈鄭使君

密座移紅毯。酡顏照綠盃。雙娥留且住。五馬任先迴。醉耳歌催醒。愁眉笑引開。平生少年興。臨老暫重來。

江亭夕望

憑高望遠思悠悠。晚上江亭夜未迴。日欲沒時紅浪沸。月初生處白煙開。辭枝雪蕊將春去。滿鏡霜毛送老來。爭敢三年作歸計。心知不及賈生才。

酬元員外三月三十日慈恩寺相憶見寄

悵望慈恩三月盡。紫桐花落烏關關。誠知曲水春相憶。其奈長沙老未還。赤嶺猿聲催白首。黃茅瘴色換朱顏。誰言南國無霜雪。盡在愁人鬢髮間。

偶然二首

楚懷邪亂靈均直。放棄合宜何惻惻。漢文明聖賈生賢。謫向長沙堪歎息。人事多端何足怪。天文至信猶差忒。月離于畢合霧沍。有時不雨誰能測。火發城頭魚水裏。救火竭池魚失水。乖龍藏在牛領中。雷擊龍來牛枉死。人道著神龜骨聖。試卜魚牛那至此。六十四卦七十鑽。畢竟不能知所以。

中秋月

萬里清光不可思。添愁益恨遠天涯。誰人隴外久征戍。何處庭前新別離。失寵故姬歸院夜。沒蕃老將上樓時。照他幾許人腸斷。玉兔銀蟾遠不知。

謝李六郎中寄新蜀茶

故情周匝向交親。新茗分張及病身。紅紙一封書後信。綠芽十片火前春。湯添勺水煎魚眼。未下刀圭攪麴塵。不寄他人先寄我。應緣我是別茶人。

攜諸山客同上香鑪峯遇雨而還沾濡狼藉互相笑謔題此解嘲

蕭灑登山去。龍鍾遇雨迴。磴危攀薜荔。石滑踐莓苔。襪汗君相謔。鞋穿我自咍。莫欺泥土脚。曾踏玉階來。

彭蠡湖晚歸

彭蠡湖天晚。桃花水氣春。鳥飛千白點。日沒半紅輪。何必爲遷客。無勞是病身。但來臨此望。少有不愁人。

酬贈李鍊師見招

幾年司諫直承明。今日求真禮上清。曾犯龍鱗容不死。欲騎鶴背覓長生。劉綱有婦仙同得。伯道無兒累

更輕。若許移家相近住。便驅雞犬上層城。

西河雨夜送客

雲黑雨脩脩。江昏水闇流。有風催解纜。無月伴登樓。酒罷無多興。帆開不少留。唯看一點火。遙認是行舟。

登西樓憶行簡

每因樓上西南望。始覺人間道路長。礙日暮山青簇簇。浸天秋水白茫茫。風波不見三年面。書信難傳萬里腸。早晚東歸來下峽。穩乘船舫過瞿唐。

羅子

有女名羅子。生來纔兩春。我今年已長。日夜二毛新。顧念嬌啼面。思量老病身。直應頭似雪。始得見成人。

讀靈徹詩

東林寺裏西廊下。石片鐫題數首詩。言句怪來還校別。看名知是老湯師。

聽李士良琵琶

聲似胡兒彈舌語。愁如塞月恨邊雲。閑人整聽猶眉斂。可使和蕃公主聞。

昭君怨

明妃風貌最娉婷。合在椒房應四星。只得當年備宮掖。何曾專夜奉幃屏。見疎從道迷圖畫。知屈那教配虜庭。自是君恩薄如紙。不須一向恨丹青。

閑吟

自從苦學空門法。銷盡平生種種心。唯有詩魔降未得。每逢風月一閑吟。

戲問山石榴

小樹山榴近砌栽。半含紅萼帶花來。爭知司馬夫人妬。移到庭前便不開。

編集拙詩成一十五卷因題卷末戲贈元九李二十

一篇長恨有風情。十首秦吟近正聲。每被老元偷格律。苦教短李伏歌行。世間富貴應無分。身後文章合有名。莫怪氣羸言語大。新排十五卷詩成。

湖上閑望

藤花浪拂紫茸條。菰葉風翻綠剪刀。閑弄水芳生楚思。時時合眼詠離騷。

